

Dª ROSA-ANA PRADA QUEIPO SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O DÍA 29 DE ABRIL DE 2010. DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE

ACTA DA SESIÓN ORDINARIA LEVADA A CABO POLO PLENO DO CONCELLO O DÍA 29 DE ABRIL DE 2010.-

No Salón de Sesiões da Casa do Concello de Ames, ás vinte horas e trinta minutos (20.30) do xoves 29 de abril de 2010, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Carlos Antonio Fernández Castro**, e coa asistencia das/os señoras/es concelleiras/os seguintes:

Grupo municipal socialista	Grupo municipal Popular	Grupo municipal do BNG
Patricia Conde Lois Carmen Fraga Crespo Mª Isabel González Cancela José Manuel Miñones Conde Gustavo Nieto Santiago Úrsula Seijas Seoane José Varela Abeledo Francisco Villaverde Marcos	Santiago V. Amor Barreiro Mª Dolores Fernández Álvarez Ramón García Argibay Emilio Martínez Carballeira Bernardo Moar Míguez José Pérez Bello Alfonso Rey López	Olalla Alvite del Río Xosé M. Fernández López David Santomil Mosquera Vitor Vicente Díaz Mercedes Vidal Baamonde

Asisten a señora **interventora** dona María del Carmen Castro Louzao e o señor **tesoureiro** don Santiago González Prado.

Actúa como **secretaria** a titular da Corporación dona Rosa-Ana Prada Queipo.

O señor alcalde don **Carlos Antonio Fernández Castro** saúda a todas/os as/os presentes e da comezo a sesión ordinaria do Pleno municipal correspondente ó día 29 de abril de 2010.

A) PARA DAR CONTA:

Punto Primeiro.- Dar conta dos decretos ditados pola Alcaldía dende a última sesión plenaria ordinaria.

O señor alcalde informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Informa o señor alcalde que dende o decreto de convocatoria da anterior sesión plenaria ditáronse un total de 127 decretos, sendo o decreto nº 376/2010 o correspondente á convocatoria desta sesión.

Punto Segundo.- Dar conta da solicitude á Xunta de Galicia da subvención destinada ao cofinanciamento da prestación de servizos sociais polas corporacións locais (Plan Concertado 2010).

O señor alcalde don **Carlos Antonio Fernández Castro** en cumprimento da

correspondente convocatoria, da conta ao pleno da solicitude do Plan Concertado 2010, que presenta un orzamento total de 1.120.422'40 euros, solicitando achega da Comunidade Autónoma e do Ministerio de Sanidade e Política Social por importe de 516.179'54 euros.

B) PARA DELIBERACIÓN E ACORDO:

Punto Terceiro.- Aprobación, se procede, de acta anterior.

Informa o señor alcalde que a acta que se somete a consideración da corporación é a correspondente á sesión plenaria de 25 de marzo de 2010.

Non se producen intervencións, e sometida a votación, a mesma é aprobada por unanimidade da corporación.

Punto Cuarto.- Revisión ordinaria contrato de limpeza viaria e xestión do punto limpo exercicio 2009.

Intervén a concelleira delegada de Economía e Facenda dona **Patricia Conde Lois**, que introduce o asunto dicindo que a empresa concesionaria XXXXX presentou escrito solicitando a revisión ordinaria tal e como establecen os pregos de licitación, que os servizos técnicos do concello informan favorablemente a revisión, sendo o canon mensual a aboar polo concello a partires de agora 49.024'56 euros, mais os atrasos correspondentes ao 2009.

Intervén a concelleira do grupo municipal do BNG dona **Olalla Alvite del Río**, que indica substancialmente que é esta a segunda revisión ordinaria, que a primeira foi aprobada o 30 de abril de 2009 por unanimidade plenaria. Que o seu grupo municipal fixo varias propostas de mellora do servizo, as que o goberno contestou que se estaba preparando unha revisión extraordinaria, que foi tratada en maio do ano pasado quedando sobre a mesa, a espera do informe solicitado sobre as novas zonas a limpar, que a día de hoxe non se ten recibido. Agardan esa información que permita levar a cabo a revisión extraordinaria e poñer en práctica as melloras propostas. Remata anunciando o voto favorable do seu grupo.

Intervén o voceiro do grupo municipal popular don **Santiago Amor Barreiro**, para manifestar a súa estrañeza pola tardanza en traer este asunto a pleno, pasados xa 7 meses da presentación do escrito de revisión pola concesionaria. Incide, en que está pendente a revisión extraordinaria que quedou enriba da mesa nunha sesión plenaria e pregunta ao goberno municipal se xa clarexaron se as novas zonas a limpar se poden incluír no contrato existente ou teñen que sacalas a concurso. Lembra que o seu grupo solicitou en varias ocasións, mesmo por escrito, información sobre o estado en que se atopan os pagos á concesionaria e se interesa por se esta ten reclamado intereses de demora por retraso nos pagos.

Intervén a concelleira delegada de Economía e Facenda dona **Patricia Conde Lois**, que di que un dos motivos de facer esta revisión agora é que a finais de ano non había dotación de crédito e que este se puido habilitar coa prórroga do orzamento. Respecto da revisión extraordinaria manifesta que as propostas feitas dende o grupo municipal do BNG se están estudando polos servizos técnicos, e que o feito de seguir pendente a revisión extraordinaria, que virá pronto a pleno, non implica que o servizo non se estea a prestar correctamente. En canto os pagos á concesionaria di que aínda sendo certo que na Comisión Informativa o grupo municipal popular solicitou información, ela, como concelleira, propuxo que o fixeran por escrito, ao igual que se solicita o resto da documentación, pois se trata de datos internos do concello que tamén afectan a

terceiros, e presentada a solicitude, aínda se está en prazo de contestación. Remata dicindo que a concesionaria está facendo en todos os concellos reclamacións de intereses de demora, que en relación a presentada no concello de Ames, os servizos técnicos emitiron informe dado que existe discrepancia.

Intervén o voceiro do grupo municipal popular don **Santiago Amor Barreiro** para preguntar a cantidade sobre a que existe discrepancia, intervindo o tesoreiro do concello don **Santiago González Prado** para informar que a discrepancia é aproximadamente á metade do reclamado, independentemente da existencia de cuestións doutra índole sobre as que tamén hai discrepancia. Insiste o señor **Amor Barreiro** en coñecer a cantidade, contestándolle a concelleira dona **Patricia Conde Lois** que a empresa solicita intereses de demora por valor de mais de vinteseis mil euros e o informe técnico indica que proceden pouco mais de dezasete mil euros, finalizando o señor **Amor** a súa intervención manifestando que o seu grupo está á espera da información solicitada.

Rematadas as intervencións o pleno da corporación adopta, por unanimidade dos seus membros, os seguintes acordos:

Primeiro.- Prestar aprobación á revisión ordinaria do contrato de limpeza viaria e xestión do punto limpo exercicio 2009 coa empresa XXXXX. O coeficiente de actualización correspondente ao ano 2009 é de 1'0772, pasando a ser o novo prezo 588.294'77 euros, con efectos retroactivos dende o 1 de xaneiro de 2009.

Segundo.- Facultar ao señor alcalde presidente Carlos Antonio Fernández Castro para cantas actuacións de trámite sexan precisas para a mellor execución do acordado.

Punto Quinto.- Aprobación da Conta Xeral 2007.

A concelleira de Economía e Facenda dona **Patricia Conde Lois** presenta este punto dicindo que o 16 de novembro de 2009 dictouse decreto de aprobación da liquidación do orzamento 2007, do que se dou conta ao pleno na sesión ordinaria de novembro, sendo emitido informe da intervención o 14 de decembro, e convocada o 21 de decembro de 2009 a Comisión Informativa Permanente de Facenda, Persoal, Reforma administrativa e Especial de Contas, a cal celebrou sesión o día 15 de xaneiro de 2010, dictaminando favorablemente o asunto coa abstención dos grupos popular e do BNG. Sometida a exposición pública sen que foran presentadas alegacións, procede agora sometela a aprobación plenaria.

Indica que a conta xeral 2007 amosa unha liquidación positiva, que o resultado orzamentario é positivo, cumpríndose o principio de estabilidade orzamentaria, e reducíndose a débeda a longo prazo, xa que se cumpriron as obrigas de amortización e non foi concertada ningunha nova operación de préstamo. A diferenza de anos anteriores, hai un remanente de tesouraría negativo, que pon de manifesto o estado de liquidez existente no concello a curto prazo, para o cal, coñecidos os informes de intervención, se iniciaron as medidas correspondentes para que non suceda o mesmo no futuro. Remata dicindo que o departamento de intervención está a traballar no peche da conta xeral do 2008.

Intervén o voceiro do grupo municipal do BNG don **Xosé Manuel Fernández López**, que di substancialmente que a virtualidade da aprobación da conta xeral 2007 en abril do ano 2010 e a súa eficacia para corrixir deficiencias perderon sentido, pois o prazo de aprobación da conta, outubro de 2008, superouse amplamente. Indica que o ano 2007 foi de transición, téndose pasado dun goberno de coalición ao goberno actual

monocolor, sendo por tanto a conta 2007 de dous gobernos, e cun orzamento prorrogado. Continúa que hai un indicador, o remanente negativo de tesouraría, que é de gran importancia, como indica o informe de intervención, pois reflicte a liquidez a curto prazo, preguntando se no 2009 se continuou igual ou se se tomaron medidas para corrixilo. Lembra que no ano 2006, con goberno de coalición, o remanente de tesouraría foi positivo.

Expón que o informe de intervención indica varias posibilidades para corrixir o remanente negativo e considera que a situación é surrealista porque na conta xeral que se aprobará hoxe ningunha das solucións se puido adoptar, sendo esta unha das consecuencias de que o concello vaia a remolque na rendición das contas. Di que ao grupo municipal do BNG preocúpalle este asunto e agarda que non se repita no futuro.

Intervén o concelleiro do grupo municipal popular don **Ramón García Argibay**, que substancialmente indica que, estando de acordo co compañeiro do BNG en que aprobar hoxe a conta xeral do 2007 é extemporáneo, quere acudir ao informe de intervención, ocasión que aproveita para lembrar que dende hai case un ano este departamento está dirixido por outra persoa a que quere felicitar polo seu traballo, solicitando ao grupo de goberno que rectifique a lapidación pública do anterior interventor, xa que a actual interventora pon de manifesto o mesmo que dicía o interventor anterior.

Di que o mais salientable da conta xeral 2007, é que o remanente de tesouraría é negativo o que pon de manifesto que o concello se enfronta a unha crise de liquidez. Que a rendición de contas é un acto esencial de fiscalización e que o non ter presentado as contas en prazo supón entre outras que non se pode optar a ningún tipo de subvencións, provocando desconfianza na institución municipal. Que o seu grupo incluía no documento de negociación do orzamento 2010 o asunto das domiciliacións bancarias, xa que sempre lles pareceu un agravio comparativo que uns provedores cobrasen ao día por ter as facturas domiciliadas e outros non, e que este extremo figura tamén no informe da intervención municipal.

Indica que os informes de intervención que se emitiron no período 2007 foron 75, sendo de reparo ou disconformidade 46, e de recomendacións 29. Lembra o problema acontecido hai pouco pola folga da empresa de limpeza e refírese ao informe de intervención do 23 de xullo de 2007, na parte relativa á aprobación de facturas desta mesma empresa que foron informadas con advertencia considerando que a situación laboral da mesma sería subsanada prontamente, pero dende xullo de 2007 non se solucionou ate hai pouco. Continúa dando lectura a parte do informe que se refire a que era imprescindible poñer os medios precisos para proceder á licitación do contrato de xeito inmediato *máxime tendo en conta a conflitiva situación que está a atravesar a empresa prestadora*, e di “a iso se lle chama planificación”. Continúa dando lectura a outro informe de disconformidade referente a facturas emitidas por unha asesoría técnica externa, por considerar que as deficiencias, xa advertidas pola intervención en meses anteriores, non foran subsanadas. Alude tamén a empresa, “Agora Aberta”, referíndose a un informe de xullo de 2007 relativo a unhas facturas das que se informa desfavorablemente (...) *ao tratarse de prestacións encadrables dentro da categoría dos contratos administrativos de servizos, estanse a superar os límites temporais e cuantitativos establecidos pola normativa (...) polo* que o que hai que facer con respecto ao anterior é licitar o servizo para que todas as empresas teñan a oportunidade de presentarse, e no caso referido non se cumpriu.

Reitera que o goberno municipal debe pedir desculpas pola lapidación do anterior

interventor, porque xa no 2007 se estaban facendo estas advertencias. Continúa que hai moitos informes no mesmo sentido, e que como non fixeron caso ás recomendacións aí está o resultado.

Refírese tamén á execución do orzamento 2007 dicindo que o bipartito cumpriu nunha porcentaxe elevada o gasto planificado, pero que en canto a inversión só se investiu o 50% do programado, que programando 12 millóns de euros por venta de patrimonio executaron cero. Remata a súa intervención dando lectura a unha parte do informe de intervención de 13 de novembro de 2009, dicindo que ao final o tempo pon a cada un no seu lugar e invitando ao goberno a rectificar, sobre todo nestes tempos de situación económica lamentable.

Intervén a concelleira de Economía e Facenda dona **Patricia Conde Lois**, para dicir , en primeiro lugar, que non vai pedir desculpas pola suposta lapidación do anterior titular de intervención, que non existiu, pero que a realidade é que dende o cambio na intervención, o ritmo de traballo mellorou cunha fixación de calendario na rendición de contas e aproveita para agradecer o traballo e o esforzo dos servizos técnicos.

En canto o remanente de tesouraría negativo di acudindo o informe de intervención , (...) *hai que poñer de manifesto que é previsible que esta situación de déficit de tesouraría se reitere no exercicio 2008, dado que un factor importante se non o determinante na consecución deste remanente negativo é a falta de concertación das operacións de préstamo, previstas en distintos orzamentos mentres que o gasto si se está executando, que a este respecto o 29 de novembro de 2007 o goberno trouxo a pleno o inicio dunha operación de préstamo que foi aprobado abríndose un prazo de presentación de ofertas por parte das entidades bancarias e facendo unha adxudicación pola mesa de contratación, pero no pleno do 28 de febreiro de 2008 esa proposta da mesa de contratación foi rexeitada coa abstención dos dous grupos da oposición. A consecuencia foi que todas as inversións previstas con préstamo no 2007 se tiveron que financiar con recursos propios, pola contra, na Xunta de Goberno Local de 19 de novembro, foi concertada unha operación, que o alcalde si podía concertar, adxudicada o 30 de decembro de 2009.*

En canto as domiciliación bancarias di a concelleira que é unha situación arrastrada dende o goberno do Partido Popular e que se está traballando para solucionala

En canto os informes de reparo din que do total só tres cuestións están pendentes a día de hoxe, dous delas dependen do departamento de contratación, e se prevén arranxar en breve coa entrada en vigor do novo orzamento. Di que desexan resolver en concreto o expediente das instalacións deportivas de Bertamiráns, problema tamén herdado do goberno popular.

En relación a execución do gasto, indica que foi boa, e que as veces o gasto previsto non se executa porque o fan outras administracións.

Alude aos avances habidos na recadación executiva, reitera que os servizos técnicos están traballando arreo, considerando importante a incorporación da figura do tesoureiro e deixando ben claro que un dos obxectivos que tiña o goberno, ter as contas do 2008 e 2009 a 31 de decembro, non foi posible pola aparición de dificultades engadidas non previstas.

O señor alcalde don **Carlos Antonio Fernández Castro** abre unha segunda quenda de intervencións outorgando a palabra ao voceiro do grupo municipal do BNG don **Xosé Manuel Fernández López** que fai dúas puntualizacións, a primeira delas que en

xestión económica non hai que confundir as decisións políticas coas técnicas e que non vale xustificar unhas coas outras, reiterando que un debate sobre un exercicio de hai tres anos está descontextualizado. Pensa que se teñen tomado decisións políticas importantes dirixidas a unha mellor xestión, como a incorporación do tesoureiro, iniciativa política de consecuencias técnicas positivas coa que o BNG concordou sempre, téndose non obstante que tomar moitas decisións políticas aínda para mellorar a situación económica municipal. A outra puntualización é en relación ao crédito do 2007, o grupo municipal do BNG se abstivo, non considerando súa a responsabilidade de que o goberno municipal decidise asumir un goberno en minoría, lexitimamente pero sen os votos suficientes para sacar adiante determinados asuntos.

Fai uso da súa segunda quenda de intervencións o concelleiro do grupo municipal popular don **Ramón García Argibay** para dicirlle á concelleira de Economía e Facenda que non tente botarlles enriba aos funcionarios do concello pois o primeiro en recoñecer o seu traballo é o seu grupo municipal, pero que planificación política non está no dicionario do goberno. Do informe de intervención de 13 de novembro de 2009 fai fincapé na parte que di *se ben na actualidade se deron os primeiros pasos para superar algunhas das deficiencias do departamento, como é o feito de que as nóminas se empecen a elaborar parcialmente no departamento de persoal ou que algunha das funcións propias de tesouraría se estean derivando a este departamento* (interrompe a lectura para dicir que hai que lembrar que antes non había tesoureiro e agora si, e se antes se tivera planificada esta situación non se estaría agora a falar disto, pero o goberno pon desculpas de mal pagador) *a práctica diaria pon de manifesto que o proceso é longo e polo de agora non é suficiente para evitar o retardo na liquidación dos exercicios 2007 e 2008 e na rendición das respectivas contas xerais*. Continúa que o informe é moi recente e por iso piden que o goberno teña a valentía de rectificar na lapidación que fixeron do anterior interventor, sendo o grupo de goberno quen bota a culpa aos técnicos e non o Partido Popular, que considera moi loable o seu traballo. Manifesta que no concello se gasta moito e se toman poucas decisións, e dirixíndose ao concelleiro don Gustavo Nieto Santiago dille que emiten cartas aos administrados, usando os medios públicos, para botar culpas á oposición e facendo unha campaña deleznable e falsa.

En relación ao afirmado pola concelleira de Economía e Facenda de que se atoparon situacións herdadas di o señor Argibay que no 2003 había 75 traballadores e agora hai 279, polo tanto, nada de situación herdada, levan gobernando sete anos e xa vai sendo hora de que se corrixan.

En relación ao gasto di que el non dixo que o gasto fora moito senón que atinaran ben o gasto e que é comprobable examinando os resultados, o goberno atinou e dálles o parabén. Se o PP insiste no tema das inversións é porque o que se deu no ano 2007 seguramente se dará nos anos seguintes, seguidamente da lectura ás porcentaxes de execución respecto das previsións di que son os números da conta xeral do 2007 e o PP non inventa nada. En canto ao que dixo a concelleira dos atrancos na conta do 2008 di que o PP aínda non botou en cara que non estivera feita a conta do 2008 a 31 de decembro, aínda que seguramente o farán no seu momento. Respecto dos atrancos no camiño, di que é misión dos gobernantes solucionarlos e planificar.

Pecha a quenda de intervencións a concelleira de Economía e Facenda dona **Patricia Conde Lois** indicando ao señor García Argibay que o goberno ten unha planificación política en canto á rendición de contas, que todos os gobernos atopan atrancos no camiño, que neste caso foron mais dos previstos, e tamén os solucionaron. Que se o

informe de intervención de novembro falaba dunha suposta falta de medios, tras a reestruturación habida no departamento a día de hoxe está ao 100% do seu rendemento, reitera que houbo informes de reparo herdados do PP, coma a limpeza de interiores, a psicopedagoga da aula de Adames, mantemento das instalacións deportivas de Bertamiráns e moitos mais. En canto á execución dos investimentos di que é un dato puramente contable, o que non quere dicir que non se executara inversións puideron facerse con financiación externa, como no caso da Travesía do Porto.

Rematadas as intervencións o pleno da corporación por maioría simple, cos votos a favor dos 9 membros do grupo municipal socialista e a abstención dos 7 membros do grupo municipal popular e dos cinco membros do grupo municipal do BNG, adopta os seguintes acordos:

Primeiro.- Prestar aprobación á Conta Xeral do concello de Ames correspondente ao exercicio 2007.

Segundo.- Facultar ao señor alcalde presidente Carlos Antonio Fernández Castro para cantas actuacións de trámite sexan precisas para a mellor execución do acordado.

Punto Sexto.- Aprobación inicial orzamento municipal 2010 e adopción de acordos que procedan.

A concelleira de Economía e Facenda dona **Patricia Conde Lois** inicia a presentación deste asunto dicindo que o pasado mes de marzo o goberno presentou aos grupos da oposición o borrador de orzamento 2010, abríndose un período de negociacións, primeiro a través de xuntanzas de voceiros e posteriormente a través de xuntanzas bilaterais, téndose ao final chegado a acordo co grupo municipal do BNG o 15 de abril, tras incorporar unha serie de modificacións.

Que o orzamento que se trae definitivamente a aprobación é de 28.732.035,02 euros, diminuído con respecto ao do 2008 nun 14'29%, pero que non é un orzamento co que se poda comparar porque nese ano había unha previsión de ingresos de venda de patrimonio de solo, que agora non existe.

Que é un orzamento equilibrado, que recolle a previsión de gastos e ingresos para financeiros, facendo de seguido un repaso polos diferentes capítulos de gastos e ingresos.

Orzamento de Gastos.-

Capítulo I recolle os gastos de persoal: recóllense os créditos necesarios para atender os compromisos adquiridos en relación ao persoal, se orzamenta o necesario para garantir o persoal existente. Incrementase nun 7.34% debido ás variacións de persoal sobre o 2008. En canto ao persoal laboral engádese o crédito orzamentario para a contratación temporal de persoal en distintos departamentos municipais. En canto ao persoal funcionario inclúense no anexo de persoal 12 prazas que non estaban previstas no orzamento do 2008, todas elas incluídas na relación de postos de traballo.

Recóllese o incremento que se aplica todos os anos, neste caso do 0.3% respecto do ano 2009, Lei 26/2009, de 23 de decembro, de Orzamentos Xerais do Estado para o ano 2010. Tamén se dota unha partida para o fondo de acción social, que non estaba prevista no orzamento do 2008 por non existir un acordo ao respecto. Contémplase ademais a reclasificación da policía, que pola Lei de coordinación de policía locais corresponde establecer, que non supón incremento retributivo.

Contémplanse partidas específicas para amparar o pago de horas extraordinarias,

gratificacións e produtividade dos traballadores municipais.

O capítulo II, gastos en bens e servizos, aumenta un 7.31% respecto do orzamentado no 2008. Este capítulo experimenta un incremento considerable, derivado principalmente ao maior custe que suporá no 2010 o pago dos servizos máis importantes do Concello, entre eles o abastecemento de auga, o saneamento, a recollida e xestión dos RSU, o servizo de asistencia a domicilio ou a realización das actividades deportivas.

Tamén se recollen distintos programas educativos e de carácter social existentes na actualidade, servizos como a rede de comedores escolares, o servizo de transporte adaptado, as axudas de emerxencia social, o programa Amessan, os servizos de conciliación da vida familiar e laboral (Bos días, Tardes Divertidas, etc.)

Respecto do borrador inicial de orzamento minoráronse distintas aplicacións orzamentarias para dar cobertura a outros gastos incorporados. Incorporouse unha partida orzamentaria para a cobertura dos gastos derivados da implantación do servizo de transporte no rural por importe de 50.000 euros. Como resumo deste capítulo se pode dicir que é un dos mais densos, incrementado inicialmente en 800.000 euros, se ben se reduciron gastos noutras partidas en mais de 700.000 euros e como consecuencia das negociacións esa redución chegou a case un millón de euros e a subida respecto do 2008 é de 600.000 euros.

Capítulo III, tamén se contemplan intereses e amortizacións, fixando as cantidades suficientes para facer fronte ó pagamento dos intereses e amortizacións que están pendentes de pago tal e como se amosa no estado da débeda que figura neste expediente e que fundamentalmente son de épocas anteriores. O capítulo III descende un 30,11% respecto do 2008 ao non concertarse ningunha operación de préstamo, ascende a 640.000 euros, experimenta un pequeno incremento respecto do borrador inicial como consecuencia do incremento da apelación ao crédito.

Capítulo IV: Transferencias correntes, axudas, convocatorias de subvencións e motivos polos que se incrementa este capítulo. Garántese a continuidade das convocatorias anuais, das que se beneficiarán, un ano máis, e entre outras, as familias numerosas, as ANPAS os centros de ensino, entidades culturais, de festexos e deportivas, o comercio local, a mocidade, os usuarios do transporte público e os solicitantes de axudas para a compra de material escolar. Tamén se manterán as axudas de emerxencia social. Incrementáanse nun 20% respecto do borrador inicial o importe consignado para subvencións de concorrencia competitiva.

Aumentan tamén as achegas a outras administracións, en concreto á Comunidade Autónoma, que se incrementa case un 50 por cento consecuencia fundamentalmente da achega do Concello ao Consorcio Galego de Servizos de Igualdade e Benestar para o funcionamento da escola infantil de Figueiras (165.000), así como as achegas no marco do Plan Comarcal de Transporte, que ascende a mais de 300.000 euros.

En Investimentos contéplanse actuacións en todas as áreas de xestión municipal, apostando por continuar estendendo a rede de saneamento e abastecemento por todo o rural amiense. Así preténdese completar a rede de saneamento nas parroquias de Agrón e Trasmonte, vanse destinar 340.000 euros para a recollida, eliminación e tratamento de residuos, está previsto instalar varios colectores soterrados, inversión en alumeadado público por 232.000 euros, en Parques e Xardíns por 818.000 euros, desenvolvemento do plan de accesibilidade 100.000 euros, fomento do emprego 144.000 euros, dotación ao Obradoiro de Emprego existente con 190.000 euros. Tamén se vai investir fortemente en promoción cultural por 470.000 euros, cun incremento respecto do borrador inicial, en concreto para ao local sociocultural de

Ortoño. Prevese investir en melloras de instalacións deportivas por importe de 200.000 euros, en estradas por 320. 000 euros, en camiños veciñais por 435.000 euros, na elaboración do inventario municipal en 100.000 euros, e tamén no avance e implantación da administración electrónica por 267.000 euros. Cabe sinalar que excepcionalmente e a diferenza doutros anos, no anexo de investimentos se inclúe un capítulo de facturas correspondentes a un recoñecemento extraxudicial de crédito que se corresponde con gastos de inversión producidos no ano 2009 e así garantir a existencia de crédito. Respecto do 2008 o capítulo de investimentos reais diminúe nun 44'22 %, non sendo comparable porque o 2008 foi un ano excepcional, e o concello recibe outro tipo de aportacións para inversións como poden ser o Plan Zapatero do que o ano pasado recibimos 4.500.000 de euros e este ano 2.700.000 euros, que complementan o anexo que temos de investimento municipal.

Por último no apartado de gastos se contemplan transferencias de capital, e neste senso se dotan 166.000 euros que se corresponden con subvencións a colectivos veciñais, incremento tamén froito das negociacións habidas. Destaca o gasto destinado a infravivenda, que alcanza neste exercicio 80.000 euros.

Todos estes gastos se financiarán con ingresos, e o orzamento detállos. Hai unha diminución importante na recadación de impostos de instalacións e obras e na venta de patrimonio municipal de solo a consecuencia da crise inmobiliaria, podendo falar fundamentalmente de que os ingresos mais importantes neste ano se corresponde co IBI e as axudas doutras administracións, que suman 11.000.000 de euros. Temos nove capítulos que detallan as previsións de ingresos que vai ter o concello, en detalle:

O capítulo I se refire a impostos directos, o IBI, o IAE e o IVTM, fundamentalmente o IBI, pola revalorización catastral do 2004, que provoca un incremento anual dun 10%, incrementándose moito con respecto ao 2008, polas altas habidas e pola actividade inspectora, pero isto non supón incremento da presión fiscal, porque hai uns meses acordamos a conxelación de impostos.

No capítulo II se contemplan os impostos indirectos, fundamentalmente o imposto de instalacións, construcións e obras, coa previsión de ingresar por este concepto 2.400.000 euros. Este capítulo experimenta unha diminución respecto do 2008 polos efectos da crise.

O capítulo III fala das taxas e prezos públicos, que supoñen un incremento moi importante respecto do 2008 e do proxecto inicial, contemplando as aportacións que teñen que facer os sectores correspondentes ao proxecto da Travesía do Porto.

O capítulo IV prevé ingresos por transferencias correntes, externos. Cabe destacar que a achega fundamental é do Estado, a previsión é que nos aporte 4.100.000 euros, axudas da Comunidade Autónoma a través do Fondo de Cooperación Local por 900.000 euros e do FEELS para gasto corrente por 560.000 euros, e outras transferencias da Deputación por 517.000 euros, o que supón que para gasto corrente teremos un ingreso de mais de 6.000.000 euros.

Tamén teremos ingresos para obra, recibiremos axudas do Estado por 148.000 euros, da Comunidade Autónoma por 52.000 euros e da Deputación, en concreto para o Plan de Obras e Servizos 472.000 euros, para o POS complementario 120.000 e para o convenio da execución da Travesía do Porto 400.000 euros, co cal as achegas para inversións se elevan a 1.193.000 euros

Os ingresos de venta de patrimonio do solo, diminúeo substancialmente, prevese

ingresar 818.147'19 euros para executar o proxecto do Parque recreativo no Milladoiro.

Finalmente, a previsión de concertación dun préstamo que financiará o 54% das obras previstas no capítulo de investimentos, se prevé acudir a un importe máximo de 4.411.572'63 euros. O podemos facer xa que se cumpren os parámetros de débeda viva, o límite legal é do 110%, situándonos no 56'91% no caso da concertación desta operación, se ben é certo que tamén hai que considerar os préstamos que non concertamos ate o de agora pero que por prudencia si presupostamos, aínda así non se supera o límite do 110%. Concertando todas as operacións pendentes de concertar neste ano estaríamos no 85% do límite. Por tanto cúmprese o límite de débeda viva e o parámetro de aforro neto, indicador que fala do aforro bruto que ten o concello de Ames, todo o cal nos permite que poidamos acudir a préstamo a diferenza doutros moitos concellos.

A concelleira remata a súa intervención dicindo que toda a documentación do proxecto de orzamento está en regra, con todos os estados e as bases necesarias, figurando tamén os informes técnicos correspondentes.

Intervén o voceiro do grupo municipal do BNG don **Xosé Manuel Fernández López** para dicir que coma sempre e non por retórica agradece aos traballadores do concello que participaron na elaboración desta documentación e lle facilitaron a comprensión dos datos do orzamento. Incide na conveniencia de que unha entidade local conte cun orzamento ordinario e non prorrogado, que o BNG o dixo sempre porque o considera positivo e necesario, sendo os primeiros beneficiados os compoñentes do goberno municipal e tamén os veciños. Que se ben é bastante habitual ter un orzamento prorrogado, é unha situación anómala e non desexable, provoca confusión e hoxe mesmo se falou aquí de que posiblemente haxa que pagar unha mora de varios miles de euros a unha empresa entre outras cousas porque no seu día non había orzamento nin partidas que puidesen financiar o servizo. Con respecto ao orzamento deste ano cre que o punto de partida é diferente, mais razoable, pártese dunha proposta mais realista, sendo a proposta inicial de 25 millóns de euros, que se adecúan mais á realidade económica do concello.

Di que o BNG, na liña de facer oposición rigorosa, construtiva e responsable, iniciou conversas co grupo de goberno co obxecto de debater o orzamento e incorporar aspectos clave, recolléndose uns, outros a medias e outros non, como pasa en calquera negociación. Hai un documento axuntado á documentación do pleno, que pasa a resumir:

O documento ten un primeiro apartado de compromisos que se concretan en aportacións ao propio orzamento, concretamente:

- un incremento dun 20% nas partidas destinadas a convocatorias de axudas e subvencións, críamos que era necesario porque os últimos anos non se incrementaron. Van destinadas ás familias e ás asociacións. Tamén é certo que o BNG propuxera un incremento maior.

- Unha dotación nominal de 50.000 euros para o servizo do transporte rural para os meses que quedan deste ano, é un servizo que se ven demandando dende hai tempo e hai que botarlle un pouco mais de iniciativa e vontade política.

- Incremento da partida destinada á execución do proxecto do local sociocultural de Ortoño que se eleva a 338.218 euros, que será cuberto por unha banda co previsto inicialmente para instalación xeotérmica e por outra co aumento do crédito bancario.

No documento inicial proposto polo goberno había só 60.000 euros dedicados a elaborar o proxecto.

-O reflexo no anexo de investimentos do proxecto de execución do Parque recreativo de Milladoiro, por importe de 818.147'19 euros, equipamento que todos os veciños e os membros desta corporación consideramos necesario.

- Reflexo orzamentario do proxecto de reurbanización da Travesía do Porto, tendo en conta tanto a financiación que lle corresponde ao concello para o que ten unha aportación da Deputación, e a parte que corresponde aos promotores.

Estes cinco puntos con contía económica van reflectidos nos orzamentos. Aparte dos anteriores, hai nove compromisos por parte do goberno de importancia decisiva e que son:

1º O compromiso do goberno de chegar a un prazo máximo de 90 días no pago de facturas a provedores. Aspirabamos a que ese prazo se reducise entre 30 e 45 días, pero os informes din que non pode ser. Cremos que se chegamos a 90 días a final de ano o paso cualitativo será moi importante.

2º Convocatoria de subvencións municipais e o compromiso de que unha vez aprobado o orzamento nun mes se aprobarán as convocatorias, haberá tempo para presentar as solicitudes, pero unha vez presentadas as memorias xustificativas no prazo dun mes cobraranse as subvencións.

3º Habilitar un aparcadoiro público no núcleo de Bertamiráns, na parcela municipal da avenida da Peregrina. Isto, aínda que non leva unha partida específica, ten cabida no anexo de investimento, onde hai partidas abertas.

4º Iniciar a licitación dos proxectos previstos, no terceiro trimestre do ano.

5º Posta á venda dos terreos que financiarán o proxecto Parque recreativo do Milladoiro, no terceiro trimestre do ano.

6º O inicio de execución da Travesía do Porto no segundo semestre deste ano.

7º Iniciar o local sociocultural de Ortoño antes do mes de novembro, tendo en conta que hai que licitar o proxecto.

8º Unha oferta pública de emprego nos tres meses seguintes á aprobación definitiva do orzamento con todas as prazas que permita a lei.

9º Seguir negociando e chegar a acordo nos criterios de asignación de produtividade e pago deste concepto.

Estes son os motivos polos que o BNG vai facilitar a aprobación do orzamento 2010, habendo uns beneficiarios directos deste acordo, os veciños de Ames, os clubs, as asociacións, as familias, as comunidades parroquiais e as empresas. Este non é un acordo secreto, é un acordo negociado neste salón de plenos, case retransmitido na prensa e o documento está aquí asinado polos voceiros dos dous grupos, polo tanto os compañeiros do PP tamén o teñen. O presuposto que temos agora enriba da mesa é diferente ao presuposto inicial, se reduce un 14% con respecto o do ano anterior, aínda que os ingresos correntes aumentan porcentualmente o seu peso en cifras totais é pequeno, de pouco mais dun millón de euros. Os ingresos de operación de capital diminúen o seu peso no conxunto do orzamento, dun 42% a un 22%, fundamentalmente pola caída de previsión de ingresos de venda do patrimonio municipal do solo. Os gastos correntes en conxunto segue incrementándose, pasando

dun 55% a un 77%, cremos que é demasiado alto. Os gastos de capital pasan dun 45% a un 30%.

¿Ten *handicaps* o orzamento? Evidentemente, é un orzamento do grupo de goberno ao cal se incorporaron proxectos do grupo municipal do BNG, ese é o resumo político. Os aspectos negativos que nós lle vemos son: que as operacións correntes teñen un peso excesivo, o nivel de autofinanciamento segue sendo baixo, e non se moviliza suficientemente o potencial económico propio do concello.

Descoñecemos o nivel de execución dos anos 2008 e 2009, que podía servir de contraste. O propio informe de intervención di que as previsións de ingresos son demasiado optimistas, polo que parece que superan o criterio da prudencia. A política de persoal aínda se pode mellorar moito. Non vou dicir que o BNG non estea satisfeito co acordo, pero é unha satisfacción parcial.

Finaliza a súa intervención dicindo que un orzamento pode fracasar por diversas razóns, como considerar uns ingresos moi por riba do prudente, como aconteceu co orzamento do 2008, e tamén pode fracasar porque quen ten que xestionar non sexa capaz ou manteña unha vontade política determinada de executar certas partidas e outras non, é dicir que non se cumpran os compromisos adquiridos. Di estar convencido de que o goberno vai facer o esforzo de cumprir os compromisos, aínda tendo a experiencia de que aquí se levan aprobado determinados acordos que a día de hoxe seguen sen cumprirse por falta de vontade política, pero a responsabilidade dos incumprimentos lle corresponde a quen non cumpre, non a quen facilita os acordos.

Intervén o voceiro do grupo municipal popular don **Santiago Amor Barreiro**, o cal comeza preguntando se se deron conta de que estamos en crise, aínda que sexa duro aceptalo. Di que despois do papelón que fixo o señor Fernández López criticando os orzamentos, ter que apoialos... vostede saberá o que fai. Nós mostramos a nosa vontade de negociar igual que no 2008. Desta vez se gardaron algo mais as formas, o grupo de goberno estivo facendo un *teatrillo* a sabendas de que xa tiñan entre eles e o BNG todo atado e ben atado. Falo de *teatrillo* porque despois das reunións que tivemos e as xuntas de voceiros nos sorprendeu que o grupo de goberno non mostrara o mais mínimo interese en chegar a acordo con nós, sen embargo chegou a acordo co BNG, o que obviamente respectamos. Se refire de seguido ao documento incorporado ao orzamento.

Fala do aumento dun 10% das axudas a colectivos veciñais, que son as subvencións concedidas polo concello; repasando di que a media pode estar polos 2.000 euros, que pode supoñer para unha asociación 150 ou 200 euros aproximadamente, o pouco lle vai supoñer, iso si, para o concello a suma de moitas destas cantidades si supón, sobre todo se se cobran a final de ano como o ano pasado, con convocatorias que saíron polo mes de marzo. A pena é que se esqueceran de pedir, ou o pediron pero non está no documento, axudas para as asociacións comerciais, que o ano pasado non se convocaron, ou pedirlle ao goberno que asine os convenios que aínda están pendentes con estas asociacións.

Di do transporte no rural que está claro que despois de que o alcalde ten aparcada a comisión na que estamos todos os grupos municipais, a partida é escasa. Se vemos o convenio do transporte metropolitano que hai pouco se trouxo a pleno vemos por exemplo que o concello de Teo dota só para estes sete meses para as liñas interiores (SIM) 122.500 euros, e para o próximo ano 214.000 euros.

Tamén chama a atención que durante os anos anteriores non se aumentaran as

subvencións e este ano de crise brutal si.

En canto ao local social de Ortoño di que lle parece ben pero se lles esqueceu poñer unha partida para equipamento, igual que figura no anexo de inversións unha partida de equipamento para o local social de Agrón que inauguramos no verán do ano pasado e tiveron que levantar todo o chan porque se puxo en funcionamento co material xusto.

En relación ao Parque recreativo do Milladoiro se pregunta a ver que fan, agora que o alcalde ten que buscar unha parcela nesa zona de 11.000 metros cadrados que lle pide a consellería de educación para facer un novo colexio.

Da Travesía do Porto pregunta a ver de onde vai sacar o concello os cartos para facela, 400.000 xa sabemos que llos comprometeu a Deputación, pero iso é o 17% ¿e o resto? ¿xa negociou cos promotores que teñen aínda terreos sen promover nese ámbito? Non esquezamos que aí no desenvolvemento do S-15 aínda hai un proceso xudicial, e vostedes din que se inicie no segundo semestre deste ano, que casualidade que ao rematar ese semestre empeza un ano electoral, isto parece xa un pacto de cara ás próximas municipais.

Os pagos a 90 días non o cre ninguén, pero se non se cumpre que alomenos paguen os intereses de demora que xeneren esas facturas.

O de habilitar un aparcadoiro público en Bertamirás é doado, mesmo houbo unha moción. Nunha mañá, cunha motoniveladora prepárase o terreo, pola tarde preparanse os accesos, retíranse o resto das pancartas que aínda deben quedar por alí das que puxera o BNG, é rápido de preparar. Curioso que esa partida non figure nos orzamentos.

Falan de poñer á venda os terreos para financiar obras, pero primeiro haberá que constituír o rexistro de solares, e o patrimonio municipal do solo. Non basta coa declaración de intencións do pleno. Nos informes vemos que non aparecen detallados os aproveitamentos urbanísticos, como figuran nos informes doutros orzamentos.

O apartado de convocar as prazas ocupadas por persoal interino e a oferta pública de emprego, ten sentido, outra cousa é que o fagan, despois de levar cinco anos sen convocar oferta que o fagan agora non da moi boa espíña.

O punto de buscar un acordo que fixe a distribución da produtividade do persoal, di parecerlle ben.

Permítanme facer unha proposta: fixar unha comisión de seguimento, porque en todo documento que se intente cumprir debe figurar. Señor Fernández López ¿e se non cumpren que vai facer o BNG? Cando se engana unha vez a culpa é do outro, pero cando enganan mais dunha vez a culpa tamén é de quen pacta.

Nós fixemos unha proposta baseada en diferentes puntos que entregamos na xuntanza do 22 de marzo, que tamén fixemos pública, e paso a relatar:

1º Realizar políticas activas de xestión de compras dentro da Lei de Contratos das Administracións Públicas, co que entendíamos que se conseguirían abaratar as compras e se cumpriría a lei, cousa que neste concello soe ser a excepción.

2º Redución drástica dos gastos de publicidade e propaganda, e non falo das insercións na prensa dos anuncios oficiais, senón das diferentes publicacións que se fan dende as concellarías de xeito desordenado.

3º Redución dos encargos e servizos a empresas externas. Aquí antes se falou do

número de traballadores que hai neste concello, efectivamente 279, e penso que deberíamos ter recursos suficientes tirando deles para minimizar os custos externos, entendemos que os traballadores están perfectamente capacitados, outra cousa é a capacidade dos políticos que os dirixen.

4º Redución dos gastos en comunicación, sobre todo en telefonía e servizos postais. Falamos cando presentamos a proposta da posibilidade de estudar facer os envíos por outras empresas que o fan mais barato, e no caso desta administración que fai envíos masivos, na negociación se podería conseguir aforro, independentemente dos envíos que precisan comprobante oficial.

5º Conxelación da contratación de novo persoal, co que se conseguen dous obxectivos, garantir o poder adquisitivo dos traballadores actuais e reducir gasto no capítulo de persoal.

6º Impulsar a factura electrónica para ao menos cumprir os 60 días de pago. Pedíamos tamén que se fixara un criterio de pago de facturas pendentes entendendo como prioridade a antigüidade da factura e a situación de precariedade das empresas, que remataría co agravio comparativo de ter domiciliados pagos de mais de vinte empresas que xogan con vantaxe respecto doutros provedores.

7º Que se resolveran de xeito inmediato os procesos de contratación que están abertos e aparcados, como pode ser a revisión extraordinaria do contrato de limpeza viaria ou a radio municipal.

8º Para rematar, no eido social propoñíamos que se contara con Cáritas Milladoiro e Cáritas Bertamiráns de xeito mais activo a través de colaboracións ou convenios para atender de xeito cercano os problemas da poboación con menos recursos. En conclusión, a proposta do PP pretendía acabar co excesivo gasto corrente e rebaixar a petición dun préstamo tan elevado que probablemente vai levar ao concello a unha situación de desequilibrio orzamentario.

Como ven, as nosas propostas eran serias, rigorosas e sobre todo lóxicas, tendo en conta a grave situación económica que estamos padecendo, e particularmente a gravísima situación do noso concello, que como se pode ver na orde do día deste pleno ten un pago pendente a provedores de case un millón de euros, de momento, porque entendemos, que a cantidade que se adebeda a provedores é moito mais grande, e se a isto engadimos a conta xeral do 2007 que acabamos de aprobar e na que figura a petición dun préstamo bancario de 4.411.000 euros, o panorama económico é desolador. Se me permiten a metáfora, este orzamento é unha bomba de relojería, a bomba a pon o partido socialista e o detonador o BNG. No tempo que levan vostedes confeccionando orzamentos nos últimos sete anos, e me refiro ao bipartito, antes de dereito e agora de feito, este do 2010 é probablemente o mais deficiente en termos xerais, irreal dende o punto de vista da inversión e inestable dende o punto de vista da débeda.

Da a sensación de que a irresponsabilidade do grupo de goberno crece de xeito exponencial coa participación do BNG, que ten como resultado este documento definitivo no mais sentido estrito da palabra, definitivo para a inestabilidade económica do concello. Son uns orzamentos que vostedes saben que non se van cumprir, e o tempo da e quita razóns e ao grupo municipal popular nos deu a razón no referente ao orzamento do 2008, permítanme un par de exemplos:

No ano 2008 vostedes pretendían ingresar pola venda de patrimonio 12.114.000 euros,

o resultado foi cero euros de ingresos, a consecuencia foi que o 33% dos ingresos previstos non se materializaron, o tempo nos deu a razón como ven sendo habitual, ogallá, señor alcalde, que nos tivesemos equivocado.

Tamén tiñan vostedes previsto facer inversións no ano 2008 por valor de 14.500.000 euros, nono puideron facer porque non venderon patrimonio, e no ano 2009 só investiron 2.400.000 euros. O tempo nos volve dar a razón, vostedes deixaron sen executar case o 84% das inversións previstas. Esa é a xestión do bipartito antes de dereito e agora de feito. Iso si, o gasto corrente se disparou un ano mais, permítanme o dato relativo ao ano 2003, no que o gasto corrente foi de 2.100.000 euros, e sete anos despois se multiplicou por cinco, vostedes que tanto se amparan en que o concello medra, a poboación non se multiplicou por cinco nestes sete anos, no 2003 segundo o INE eramos 20.016 habitantes e no ano 2009 pouco mais de 26.000. En situación similar se atopan os gastos de persoal, no ano 2003 había algo máis de dous millóns de euros e no 2010 máis de sete millóns de euros.

Para non cansar mais con cifras imos facer un pequeno repaso do orzamento do ano 2010.

A primeira valoración, como ven sendo habitual, é que incumpren os prazos establecidos na Lei Reguladora de Facendas Locais, o din os informes de intervención, non se poden adxuntar os avances da liquidación dos anos 2008 e 2009 debido a que non están presentadas as contas deses anos, como vostedes non teñen capacidade de xestión, acabamos de aprobar a conta do ano 2007, por moito que digan que van poñer remedio a isto. Fágome a pregunta ¿en vez de botarlle a culpa ao anterior interventor non será que vostedes non teñen o mais mínimo interese en sacar á luz as súas graves carencias? Deberían despezar a dúbida, porque do contrario un político profesional coma vostede, señor alcalde, ou profesional da política, volvería quedar en evidencia por enésima vez.

A segunda valoración é a definición deste orzamento, o de mais gasto da historia de Ames, o orzamento con mais débeda da historia de Ames e o orzamento con mais impostos da historia de Ames.

A terceira valoración é sobre o capítulo de persoal, un ano mais o persoal está en situación de precariedade, primeiro porque os sistemas de selección non son os mais axeitados, segundo porque vostede vive de espaldas á RPT, que se se fixo xa hai anos, e que debería de ser un punto e final a esa situación que se estaba a vivir no noso concello, terceiro porque non negocia con ninguén, como mostra o que acontece coa policía municipal, coa cal tivo tres anos para chegar a acordo sobre a súa reclasificación. A política de persoal que está seguindo este concello e vostede en particular, porque é o responsable de persoal, señor alcalde, é curiosa sobre todo para un sindicalista como foi vostede. Debido a isto pode ocorrer coma co orzamento do ano 2008, que algún sindicato lle recorra o orzamento.

A cuarta valoración sería sobre o capítulo 2, o gasto corrente. O que presentan supón un aumento de case un millón de euros, unha vez mais e a pesar das advertencias feitas polos técnicos da intervención e polo PP insisten en abusar deste capítulo, o que obriga a continuos recoñecementos extraxudiciais de crédito. Vostede debería saber que pagar as facturas deste xeito debería ser a excepción e non a regra. Este capítulo, xunto co capítulo 4, é por onde están vostedes, señor alcalde, a desangrar o concello. Non consideramos en época de crise que o mais adecuado sexa aumentar subvencións para festas, festexos e outro tipo de actividades, e fágolle unha pregunta,

señor alcalde ¿cre vostede que isto pasa nalgún sitio?

A quinta valoración sería ao capítulo VI, de inversións, que a pesares de que se rebaixa case á metade con respecto ao 2008, estamos en condicións de asegurar e así o afirmamos, que este capítulo está inflado, e unha das probas é que no primeiro borrador do orzamento as inversións eran escasamente 4.000.000 de euros ¿o traizoaría o subconsciente, señor alcalde, ao pasar ao dobre, de catro a oito millóns, ou é que nos quere tomar o pelo? O que se está financiando dende hai anos con venda de aproveitamentos non se pode vender así como así, debería de sabelo, segundo o artigo 177 da Lei 9/2002 de 30 de decembro de Ordenación urbanística do medio rural de Galicia, recentemente modificada pola Lei 2/2010 de 25 de marzo, di *para poder enaxenar bens do patrimonio municipal do solo é preciso que previamente estea constituído formalmente o rexistro de solares*, non vale que o pleno diga que se constituía, como fixo xa hai algúns anos, ¿onde están eses rexistros de solares, señor alcalde? unha vez mais vostede está cometendo irregularidades, pero sabemos que é a súa tónica xeral.

A sexta valoración sería sobre o capítulo noveno, de pasivos financeiros, é dicir, débeda. En varias ocasións lle demostramos que a débeda do noso concello superaba os 10.000.000 de euros, vostede mesmo sacou unha publicación que fixéramos nós con ese dato, para tentar descualificarnos, obviamente cando se queda sen argumentos, monta ese circo mediático que a vostede lle gusta. Agora non sabemos o que vai ocorrer, xa se está vendo que está empezando a descualificar, que é a súa estratexia cando non quere escoitar algo que non lle interesa. A débeda do concello son exactamente 13.965.226'50 euros, e lonxe de reducirse está aumentando exponencialmente. Vou facer unha pequena comparación, entre os datos de poboación e a cantidade de débeda, segundo o informe económico financeiro, que imos ter cando se subscriban os préstamos: se dividimos a débeda entre os 26.983 habitantes que figuran censados no INE do 2009 sae unha débeda por habitante de 517'56 euros. A media de Galicia é 250 euros, nós a duplicamos. Sigo sen entender cómo de xeito tan irresponsable cre vostede que é posible firmar unha operación deste tipo nun exercicio no que teoricamente o concello tería que apretarse o cinturón para tentar recuperarse da inestabilidade causada no ano 2008. Vostede como profesional da política ou político profesional poderá dicir que non asinou ningunha operación, pero é faltar á verdade, é pechar os ollos para non ver a realidade, vostede sabe que se gastaron os cartos e por tanto non lle vai quedar mais remedio que pedilos, é unha trampa na que se mete vostede moi perigosa. Espero que non estea esperando a que lle saia un remanente de tesouraría alto e non ter que asinar esas operacións, porque aparte de ser unha chapuza, non sería posible, e de selo cometería outra grave irresponsabilidade.

Non sei se os compañeiros do BNG se están enterando, pero podo asegurarlles que os enganaron coma chinos. Creo que deberían ter a suficiente valentía para revelar aquí as verdadeiras razóns polas que apoian este orzamento.

Un orzamento debería de facerse en función dos ingresos reais que se agarda recadar no exercicio, pero aquí non, aquí se fai ao revés, primeiro ven o que se quere gastar sen atermos a ningún tipo de límites e inflan os ingresos para que cadre, e o orzamento está feito. A consecuencia é que ao final do exercicio existirá con toda probabilidade déficit nos capítulos correntes.

Permítame que mencione o informe de intervención sobre o proxecto de orzamento páxina 4, *en resumo, tal e como se desprende dos cálculos efectuados o orzamento*

xeral do concello de Ames non se axusta ao principio de estabilidade orzamentaria, producíndose unha situación de desequilibrio ou de déficit en termos de capacidade de financiación de acordo coa definición contida no sistema europeo de contas nacionais e rexionais, de xeito que a entidade local remitirá o informe correspondente á Dirección Xeral de coordinación financeira coas entidades locais ou órgano competente que exerza a tutela financeira da comunidade autónoma no prazo máximo de 15 días hábiles contando dende o coñecemento do pleno. Así mesmo deberá aprobar un plan económico financeiro nos termos sinalados anteriormente.

En román paladino para que nos entendamos, isto non é nin mais nin menos que un orzamento deficitario, probablemente ilegal a todas luces e irresponsable, unha fuxida cara diante, e os señores do BNG son responsables de abrir a porta nesa fuxida. Vostede, como político profesional ou profesional da política, non cumpre co deber de levar ao pleno o plan de estabilidade, como pasou co orzamento do ano 2008, pero como non o trae, non incumpe esa obriga, e recorrendo a Valle Inclán podemos chamarlle esperpento, non sei se aos señores do BNG lles soa, pois Valle Inclán non escribía en galego.

A título anecdótico e falando de cinco proxectos que figuran no anexo de inversións, o inventario municipal, que agardemos que sexa a definitiva, xa que a anterior empresa non foi quen, tal e como vostede nos dixo neste pleno cando se rescindiu o contrato. Os 100.000 euros para o plan de accesibilidade non chegan, non sei en cantas fases se vai facer ese plan. Da numeración no rural direi que a ver se desta vai a vencida. Para os colectores da rúa Anxeriz 300.000 euros é unha tomadura de pelo, cando a empresa que fixo a obra presentou como mellora os colectores. Por último resulta chamativa a partida de 81.000 euros para os vestiarios do campo de fútbol de Bertamiráns, non sei se serán para ampliar os que hai actualmente ou para subsanar as deficiencias non só dos vestiarios, senón do resto da instalación deportiva.

Toma a palabra o señor alcalde don **Carlos Antonio Fernández Castro** para dicir que a intervención do señor Amor mais ben estivo orientada á urticaria que lle produce o acordo entre os dous grupos municipais que a desacreditar o orzamento. Continúa que coma o señor Amor fixo un xuízo de intencións respecto da súa vontade de traer as contas a pleno lle di que o movemento se demostra andando, e que dende que o anterior interventor abandonou esta praza se trouxo a pleno a conta do ano 2006, se acaba de aprobar a conta xeral do 2007 e se ten previsto que a liquidación da conta do 2008 estea rematada nos primeiros días do mes de maio. A continuación pregúntalle á señora interventora dona **María del Carmen Castro Louzao** se está nas súas previsións ter a conta do ano 2008 a primeiros de maio, contestando a señora interventora que si. Reanudando o señor alcalde a súa intervención di que a petición do Tribunal de Contas, se informou recentemente, da previsión de que a liquidación do 2008 estea aproximadamente para o día 5 de maio, que a intención do grupo de goberno é chegar ao final do mandato, último domingo de maio de 2011, cos deberes feitos, aproveitando para dicir que está moi satisfeito do comportamento dos técnicos municipais que están facilitando esa inxente labor e da concelleira de Economía e Facenda, que capitanea con estilo de persoa experimentada todo este proceso, a pesares da súa curta idade.

Intervén a concelleira delegada de Economía e Facenda dona **Patricia Conde Lois**, que alude o período de negociacións, dicindo que dende o primeiro momento o que fixo o partido popular non foi mais que solicitar informacións, retrasar reunións e non presentar propostas viables, mesmo publicamente deron excusas como que non se

lles facilitaban determinados informes, que non se lles presentaban as propostas en papeis membretados, selados ou asinados. Que o grupo municipal do BNG fixo e recibiu propostas sen membrete e sen sinatura, é un período de negociación, un trae e dame propostas para chegar a acordo, e como non saben o que é chegar a acordo sobre un orzamento poñen excusas baratas e rompen a negociación a través dos medios. Parece que lles provoca urticaria este acordo, que o que fai é incorporar proxectos que non estaban previstos inicialmente. É un documento que cremos que beneficia aos veciños, con propostas razoables e concretas a diferenza das súas. Falando do incumprimento do prazo de aprobación, como a maioría dos concellos galegos, mesmo sen ir mais lonxe Santiago, aínda non ten aprobados os seus.

O que din do elevado gasto corrente, xa no seu día o goberno de coalición e agora o grupo socialista en minoría aposta polo gasto social. No capítulo de persoal xa comentei o que se inclúe, as contratas dos servizos básicos, que non podemos renunciar porque son servizos que teñen que ofrecer os municipios, e tamén gastos que son a característica deste concello, de conciliación da vida familiar e laboral, en materia de emprego, de servizos sociais, de mantemento de estradas e camiños, de limpeza viaria, de actividades para a mocidade, de escolas deportivas, etc., O que variou respecto do 2008, foi produto dos incrementos habidos nas contratas que ten este concello, froito dos incrementos do padrón de habitantes, pero como xa dixen, non temos unha política de contención do gasto, desexaríamos reduci-lo, pero este goberno considera os servizos que temos a día de hoxe imprescindibles.

Reducimos en gasto corrente a pesares do aumento das contratas, redución inicial en 700.000 euros, e finalmente de case 1.000.000 de euros, redución en gastos, digamos mais superfluos, coma urbanismo, medio ambiente, administración xeral, sociedade da información, etc., polo tanto o incremento con respecto ao 2008, elévase a 600.000 euros. A súa proposta para reducir gasto corrente era a través da mellora na xestión de compras, reducir en publicidade, estudos e traballos técnicos, papelería, correo e telefonía, e tal e como se lles informou nesas xuntanzas, o goberno presentou un proxecto para redución en publicidade e propaganda, que se reduciu mais como consecuencia dos acordos habidos, pero hai gastos que non podemos reducir, porque neste capítulo se contemplan fundamentalmente anuncios nos boletíns oficiais, anuncios nos xornais, etc...

Falaban de reducir en estudos de traballos técnicos e se lles pasou un detalle, que reducimos respecto do 2008 345.000 euros tras os axustes na área de urbanismo, pero tamén lles informamos que hai gastos que non se poden reducir ou eliminar, como levantamentos topográficos que hai que facer diariamente, avaliacións de impacto acústico que solicitan os veciños, estudos de alternativas para delimitar solo empresarial, análise de augas das fontes municipais, traballos de inspección técnica, como elaboración da axenda 21 ou o plan de igualdade de oportunidades, radio, páxina Web o asesoría na área de persoal. Cabe dicir que moitos destes gastos son financiados con subvencións, e por tanto temos que presupostalos. Tamén lles informamos que se incluía nestas partidas, son as asistencias técnicas externas, facilitándolles unha lista de todas as que temos no concello ¿por que vostedes non propuxeron eliminar ningunha? porque son necesarias. É necesario o mantemento das instalacións deportivas en Bertamirás, o contrataron os seus compañeiros de grupo hai moitos anos e xa era necesario daquela. Reducir a asesoría xurídica, a psicóloga de servizos sociais, onde temos un servizo supersaturado, a logopeda de Adames, traballos que se realizan en materia de urbanismo, o mantemento informático ou o director da escola infantil ou da escola de música, ou a limpeza das escolas unitarias

mentres non se saca a nova contrata. Non houbo unha resposta ás nosas propostas porque nós como goberno non víamos tampouco onde reducir mais.

A través do novo compañeiro se está facendo xestión de redución de gastos, como vostedes propoñían, en gastos de telefonía e servizos postais. Pero son servizos fundamentais e non se pode reducir moito mais.

Analizando polo miúdo as súas propostas vemos que o total das súas propostas para redución de gasto supón 739.000 euros, co cal en realidade o que propoñían era eliminar o servizo de correos, eliminar publicacións nos boletíns oficiais, etc., gastos imprescindibles. Proposta inviable.

E propoñían reducir para aumentar a inversión, é unha forma de ver a política, nós consideramos que o gasto social tamén é unha inversión de futuro, servizos de prevención de drogodependencias, de educación, etc., inversión para ter unha sociedade mellor. E dinamizamos a economía tamén, non se paraliza porque haxa mais gasto corrente, éste dinamiza tamén a economía xenerando provedores ao longo do ano, o peixeiro, o carnicero...

Falan de que o gasto se incrementou moitísimo respecto do ano 2003, evidentemente, porque os servizos aumentaron en función da poboación. Falamos dos servizos que había no 2003 e dos que hai agora ¿cantos policía había no 2003? 10, agora 25. Comedores, no 2003 cero, agora infinitos. Cultura, no 2003 6.700 usuarios, no 2010 13.588 usuarios, no 2003 non existían actividades lúdicas para os xóvenes, no 2010 si. Tamén hai servizos como Amesán, para maiores, onde se ofrecen actividades para todo o ano, ou servizos como o da muller, que non existía no 2003, ou o servizo de atención a inmigrante. O concello asume as necesidades que xurden. E que dicir da xestión das garderías no 2003 e no 2010, ou dos colexios que había no 2003 3, e hoxe 5. Temos o dobre de habitantes. Non é que gastemos mais por habitantes, é certo que temos un gasto social mais alto no 2010 que no 2003, pero o gasto corrente é consecuencia da inversión feita nestes anos. É un principio básico en economía, deberían saber que a inversión xenera nos anos seguintes gasto corrente. Teñen que ser coherentes no seu discurso, porque no anterior pleno votamos por unanimidade o convenio coa gardería Figueiras, e supón un gasto corrente de 165.000 euros.

O informe de intervención di que hai que reducir gasto, ou mellor dito, di *que se adopten as medidas activas que permitan conter o seu crecemento*, e iso é o que nós desexamos, pero tamén di *salvo que se proceda a compensar ese incremento do gasto corrente no presente exercicio e nos sucesivos cuns maiores ingresos correntes*, é dicir que temos dúas opcións, continuar co gasto conténdonos na medida do posible pero aumentando os ingresos e establecendo prezos e taxas que se correspondan cos servizos que se prestan, e para cando traíamos esas propostas esperamos contar co voso apoio. Respecto do gasto corrente teño que dicirlles como goberno que estamos, coma todos os concellos, na situación complicada de eliminar servizos ou continuálos, nós propoñemos, e no orzamento se deron mostras, de continuar cos servizos esenciais e facelo dun xeito mais barato. O que facemos, coma todos os concellos tamén, é tentar que as contas cadren. Como ben sabedes se ledes a prensa *los concellos echarán mano del POS y del plan E para cuadrar sus cuentas*, igual ca nós. *La mayor parte aprovecharán la opción de destinar un porcentaje de estos programas a gasto corriente. La decisión del gobierno central y de la Diputación de permitir que una parte del dinero que entregarán el próximo año a los municipios a través del plan E sea destinada a gasto corriente y no sólo a inversión como hasta ahora ha sido acogida con satisfacción por los gobiernos locales, la mayor parte de ellos harán uso de una de esas*

posibilidades o de ambas para tratar de cuadrar unas cuentas muy castigadas por la crisis y la reducción de ingresos. Noticias coma esta hai moitas.

Temos unha previsión de gasto de persoal de 7.660.000 euros e xa expliquei cales son os motivos, principalmente novas prazas de persoal funcionario que non existían e hoxe si, en concreto 12, A aplicación da Lei de orzamentos, conceptos coma o Fondo de acción social que supón mais de 120.000 euros. Vostedes faloron de reducir gastos de persoal e ese gasto destinalo a inversión, conxelar a contratación de persoal novo. Nós xa informamos das vías de redución, por un lado reducir o persoal temporal e por outro reducir o persoal eventual, conformado polos administrativos dos grupos políticos e por persoal contratado para reforzo e acumulación de tarefas. O curioso é que os administrativos dos grupos foi un acordo ao que chegou a oposición contra os votos socialistas e que supón 76.775 euros. Propoñían reducir contratos vía interinidade, e tal e como expliquei, no anexo de persoal hai unha relación detallada desas contratacións e dos servizos que prestan, a maioría obrigas por lei ou normativa, en moitos casos motivadas por unha subvención, presupostase un gasto e un ingreso por outro lado. Temos así o responsable do programa de adscrición a axencia de protección da legalidade urbanística, a técnica de prevención de drogodependencias, para o que temos un convenio coa Xunta de Galicia que nos sufraga o soldo. Temos a contratación para levar a cabo o plan local de convivencia ou para a aplicación das normas do hábitat galego, a técnica en dietética, a través do programa Ames saudable, para o que temos unha subvención do 100%, e a contratación de dúas auxiliares para a formación das contas. Póñanse de acordo, por un lado queren que poñamos os medios e por outro lado propoñen reducir. En definitiva, quedou claro que se trata de postos estruturais, que procede modificar a RPT e non eliminalos.

Por último temos o anexo de persoal laboral temporal, que dende o 2003 se incrementou dando resposta ás demandas e aos servizos implantados, e se fan unha análise ven cales son os motivos, incremento da brigada de obras, un técnico de orientación laboral para os núcleos do Milladoiro e Bertamiráns, a rede municipal de comedores escolares que non existía no 2003, os 9 profesores da EMMA que tampouco existía no 2003, etc., as contratacións están xustificadas e o que procede agora é facer os trámites oportunos, nos casos en que se trate de postos novos estruturais modificar a RPT. Noutros casos se trata de persoal temporal, coma os vixiantes das piscinas. Sabían que a súa proposta era totalmente inviable. Creceu moito o persoal temporal e eu teño unha estadística feita do crecemento do persoal dende o 2003, e aparte de contratar persoal temporal, o que é perfectamente lexítimo, tamén se funcionarizou, se contratou persoal laboral fixo e interino. Por tanto, en resposta ao que vostede dixo teño que dicirle que se no ano 2003 había 36 postos de persoal funcionario no ano 2010 hai 68, laborais fixos había no 2003 47 e no 2010 99, funcionarios interinos no 2003 cero, no 2010 13, persoal eventual dos grupos políticos no 2003 cero, no 2010 3, e persoal laboral temporal, se no 2003 supoñían 263.000 euros, agora supoñen 700.000. Na nosa intención está sacar unha oferta para esas prazas que están no anexo do orzamento e figuran na RPT. Non entendo a proposta de reducir o gasto cando sindicatos, goberno e oposición no seu momento aprobamos unha RPT que contemplaba uns postos co obxectivo de que se cubriran á maior brevidade posible. Creio que existe xestión no departamento de persoal, aínda que non me corresponde a min esa área, pero son coñecedora igual que vostedes de todos os acordos aos que se chegou dende o ano 2003, o convenio colectivo para o persoal laboral que non existía antes, o acordo para aprobar a RPT, que supuxo que todos os traballadores ían cobrar o mesmo se desempeñaban o mesmo posto e non habería

discriminacións como as que había co goberno do grupo popular, se chegou a acordos cos traballadores coma o recente FAS ou outros coma os atrasos ou o pago de horas extra. Non son lóxicas as acusacións que fan de mala xestión neste ámbito.

Falan de que temos pouca inversión, que se reduce drasticamente respecto do ano 2008. Volvo repetir que todos os concellos teñen neste momento a inversión minorada. Pero a inversión prevista de 8.000.000 de euros non é a única que se vai facer no concello, temos outro tipo de axudas que figuran no programa do goberno e tamén son inversión, destaco as achegas do goberno central, as achegas do Plan Zapatero, que o ano pasado permitiron ao concello investir 4.500.000 euros en obra e este ano permite 2.800.000, o departamento de contratación está traballando para licitar as obras incluídas nese proxecto, como o centro de formación ocupacional e usos múltiples de Aldea Nova por 413.000 euros, os colectores soterrados no entorno da rúa Anxeriz por 180.000 euros, colectores na avenida da Maía, en Aldea Nova ou na urbanización As Mimosas, cada un deles por 48.000 euros, a interconexión da fibra óptica de edificios públicos para poñer en marcha a administración electrónica por 113.000 euros.

Temos que ter en conta tamén a achega do Estado para a construción do novo cuartel da garda civil que se poñerá en marcha en breve, inversión de 2.700.000 euros.

Están tamén as achegas da Xunta de Galicia, coma a gardería das Figueiras cun millón de euros, o convenio de construción da Travesía da Ponte Maceira en Agrón, 780.000 euros, o proxecto de abastecemento de auga potable 6.500.000 euros, etc.,

Achegas da Deputación para a reurbanización da rúa Travesa, reurbanización da rúa de Abaixo, convenio para a execución da Travesía do Porto, a construción da depuradora de Ameixenda, ampliación da Ponte da Condomiña, construción do cruce da Bola, xa rematado, e o POS, ao que este ano lle corresponden 600.000 euros.

Falan de inversión inflada tras a negociación e o único que se incrementou foi o proxecto da Travesía do Porto, que non se fai con aportación municipal senón coas achegas que teñen que facer os promotores e un convenio coa Deputación.

Falan tamén do parque recreativo do Milladoiro, un dos proxectos incluídos a maiores, financiado con PMS, venda de patrimonio municipal de solo, e vostedes critican esa vía, cando propuxeron financiar con PMS 1.200.000 euros.

E critican os préstamos, cando é unha fórmula mais de financiación, vostedes teñen que saber que fundamentalmente hai tres vías de financiación: fondos propios, que a día de hoxe escasean, venda de patrimonio, que tendo en conta a situación de crise se pode facer na medida do posible, subvencións, e por último, préstamos. Nós acudimos ao préstamo conscientes do que conleva e a sabendas de que a capacidade de autofinanciación é nula para facer inversión.

Falan do incumprimento do principio de estabilidade orzamentaria, claro, xa desexaría eu e moitos dos concellos cumprir ese principio. Isto quere dicir que queremos invertir pero non temos fondos propios, por ilo o que facemos é acudir á axuda externa, unha situación xeneralizada dos concellos, se acudimos á hemeroteca lemos *tres de las siete grandes ciudades de Galicia están en déficit presupuestario, una situación en la que han incurrido para mantener los servicios básicos a pesar de la caída de los ingresos iniciada en 2008*. A consecuencia é que teremos que remitir un informe á Dirección Xeral de Coordinación das entidades locais da Xunta de Galicia, e facer un plan económico financeiro. Olo, nós podemos facelo a diferenza doutros concellos, porque cumprimos os parámetros da débeda viva. Non quere dicir que concertemos o

importe máximo de 4.400.000 euros, porque ao longo do ano poden ocorrer situacións que rebaixen as necesidades. E minten cando falan de que temos unha débeda de 13 millóns de euros, realmente temos unha débeda concertada a día de hoxe que dista moito. Nos cálculos deste límite de porcentaxe de débeda tomamos en consideración a totalidade dos préstamos, polo principio de prudencia, todas as operacións que temos que amortizar que están concertadas e tamén as que non están concertadas pero si orzamentadas. Concertando toda a débeda pendente e a prevista estaríamos lonxe do límite legal (110%). Deberían alegrarse e non alarmar nin escandalizar. Nós como goberno acudimos a préstamo sen reparos, igual que o fixeron vostedes, e pagamos relixiosamente as cuotas de amortización e os intereses. A Xunta de Galicia tamén se endebedou no máximo permitido pola lei no 2009. Na hemeroteca existen multitude de noticias neste senso. En todos estes anos pasados é certo que non se concertou ningunha operación de préstamo porque non foi necesario, pero chega un momento no que non é posible financiar todo con fondos propios, e facemos isto porque é legal e digno.

Intervén o voceiro do grupo municipal do BNG don **Xosé Manuel Fernández López**, que, substancialmente, e dirixíndose aos membros do grupo municipal popular, dilles que do PP os separan moitas cousas e tamén o xeito de facer oposición. O BNG non ten medo á corresponsabilidade, co goberno e coa oposición. Sempre fixeron propostas e son unha oposición constructiva, con datos, rigorosa e documentada. O grupo municipal popular fai unha oposición tipo buldozer, levando todo por diante.

Este tipo de debates préstanse a que a lingua se descontrola ás veces, facendo afirmacións das que despois se arrepiñen, como a alusión que fixo o PP sobre Valle Inclán, non a toma como afrenta persoal, pero en todo caso e no plano político si lles lembra aos membros do grupo municipal popular que onte houbo no Senado unha votación para que se dese a posibilidade de usar as linguas do estado e o PP votou en contra, e que iso o considero indigno politicamente, unha posición política cuestionable e criticable.

As razóns pola que o BNG facilita o orzamento son as que están no documento, non hai mais, e xa se verá se a quen lle toca xestionalo é quen, pero iso é outro capítulo. As relacións non se poden basear na desconfianza, porque se non se cerraría a posibilidade de falar e de chegar a ningún tipo de acordo. Respecto da proposta do PP, lle pareceu pobrísima, pura xeneralidade. En canto aos servizos, se a poboación se quintuplicou os servizos van en consoancia, no 2003 o concello era un ermo e no eido do gasto social coinciden absolutamente co goberno municipal. Di que o PP peca de soberbia e é contradictorio, porque cando falaban das subvencións ás asociacións dixeron por un lado, estamos en crise e aumentar en festas non parece que sexa bo, e por outro lado din que é pouco aumentar, momento en que intervén o señor **Amor Barreiro** para puntualizar que o que quixo dicir é que non supón nada eses niveis de aumento para os beneficiarios, continuando o señor **Fernández López** a súa intervención dicindo que se se lle di aos directivos dos clubs ou as asociacións en xeral os corren. En canto ao transporte no medio rural lles parece pouco investimento, e ao BNG tamén, pero que hai que ter en conta que o orzamento non entrará en vigor até xuño polo menos, e o BNG critica a falta de vontade política municipal para adiantar nese tema, porque a comisión está pendente dende hai meses, pero polo menos os señores do goberno non teñen a desculpa de que non hai partida orzamentaria. Se no último trimestre do ano se implantase unha soa liña do transporte metropolitano o BNG xa o daría por ben feito. Do equipamento do centro sociocultural

de Ortoño di que non ten o maior interese que vaia unha partida para equipamento de mobiliario pois aínda hai que facer o proxecto. En canto ao Parque recreativo do Milladoiro falan de que hai que buscar parcela para un colexio de infantil, pois na zona verde do parque dende logo non vai ser, porque non se poden meter equipamentos en zona verde. En canto ao dito polo voceiro do PP de que ninguén cre o do pago a 90 días di que considera que se a final de ano se consegue isto o salto cualitativo dado será importante, que é un reto que está aí, un compromiso que fixo o goberno, e se ao final non cumpre este ou calquera outro dos acordos o BNG será o primeiro en denunciálo, pero non van adiantar acontecementos. En referencia ao dito sobre o aparcadoiro público de Bertamiráns de que non hai partida di que hai un compromiso escrito sobre ese tema e que vai contra as partidas do capítulo de investimentos, o BNG efectivamente o levou a pleno, fixo unha pancarta e o sacou nos medios, e agora conseguiron o compromiso do goberno para que se faga proximamente. Están facendo política para buscar solucións a determinados problemas. Da venda de solares di que xa se vendeu unha parcela municipal. Polo menos a oferta pública de emprego parece que ten sentido para o PP, e finaliza a súa intervención dicindo que non tería problema ningún en que o PP participase nunha comisión de seguimento, porque é un documento público e todos poden opinar sobre él.

Intervén o voceiro do grupo municipal popular don **Santiago Amor Barreiro** para dirixirse ao señor Fernández López e dicir substancialmente que non é mala intención pola súa parte dicir nada, que non é nin será o seu estilo, e referíndose ao falado da votación no Senado considera que non é este o mellor momento para gastar cartos en tradutores, un millón de euros, podendo entenderse na mesma lingua. Di que o BNG fará oposición constructiva, pero ás veces parece oposición seguidista, e que a demagogia hai que desbotala, que ninguén discute os méritos das asociacións, senón que se lles trate como se lles trata, enganándoas.

A dona Patricia Conde dille que por fin lle fan caso ao Tribunal de Contas en relación á conta do 2008, e ao señor alcalde que ten unha responsabilidade maior que a concelleira á hora de plantexar os orzamentos ao pleno, que nas reunións da negociación o PP pediu documentación á intervención e se lles entregou a contagotas, e dirixíndose ao señor Villaverde dille que lle sorprendeu que lle contestara que non tiñan un informe de gastos porque se estropeara un ordenador que estaba conectado co servidor da Deputación, intervindo o concelleiro de Cultura e Deportes don **Francisco Villaverde Marcos** para reiterar que o que dixo era verdade. Continúa o señor **Amor** dicindo que en relación á reclasificación da policía ou esta presenta un contencioso ou o concello terá que negociar. Dirixese de novo a dona Patricia Conde, lle di que non compare Ames co concello de Santiago porque as situacións políticas son totalmente distintas. Que utilizou a demagogia cando falou de gasto social, que confundía gasto social con gasto corrente, que o PP non discute os anuncios oficiais nin nos xornais, que no tema de persoal sexa valente o goberno e saque a oferta pública de emprego, que se sorprendeu vendo as facturas do abogado externo que pasaba unha minuta por varios conceptos, e por horas dedicadas dende as doce da mañá ás seis da tarde de 1.500 euros, sabendo o goberno que podería contar co asesoramento directo do persoal municipal, e levan anos así, que en sete anos non modificaron as contratacións, que seguen utilizando demagoxicamente a supresión de gasto social para botarllo enriba ao PP cando saben que non é certo. E que cando di que o gasto corrente dinamiza a economía será á hora de traballar con certas empresas, como XXXXX por exemplo, e que deu a impresión de que no ano 2003 se estaba sen saneamento e a concelleira ten que repasar de novo os datos. O que

deixou claro é que van subir as taxas, e que tamén é triste que teña que recorrer aos titulares de prensa para defenderse. Hai que xestionar mellor, e non pechar os servizos, no ano 2003 había 2 garderías municipais e segue habendo as mesmas, as mesmas casas de cultura, os mesmos pavillóns polideportivos, etc., Falan mesmo dos soldos e o PP fixo a proposta de retirar o soldo aos concelleiros e o concelleiro Gustavo Nieto dixo que non ían ir traballar gratis. O PP non falou de reducir o persoal, senón de que se saque a oferta de emprego e ademais o convenio de persoal laboral está vencido. Cando remate o exercicio económico se lles facilitan os datos xa se verá o que pasou. A concelleira fala dos préstamos e a ver se se conceden, ao mellor cos datos do ano 2008 non, que hai un préstamo que está aí porque ningunha entidade financeira lle deu para diante. Si está ben recoñecer que a Xunta de Galicia inverte en Ames, e non é certo que o PP estea en contra da venda de patrimonio, o que dixo é que hai que constituír primeiro o rexistro de solares, e non están identificadas as parcelas que se van poñer á venda. Da as grazas á concelleira por recoñecer que o orzamento non se axusta ao principio de estabilidade orzamentaria, a ver se fan ese plan económico financeiro para recuperar a estabilidade en tres anos xa que no 2008 nono fixeron. Por último dille que os indicadores de endebedamento están calculados polo ano 2007 e a interventora municipal di que este dato debería facerse coa liquidación do 2008. Remata dicíndolle á concelleira que é o colmo que diga que están pagando operacións financeiras que subscribiu o goberno do PP, porque só faltaría, como os gobernos que veñan despois terán que facer o mesmo.

Pecha a quenda de intervencións a concelleira de Economía e Facenda dona **Patricia Conde Lois** para dicir que só vai dar pinceladas porque o PP ven de facer un discurso inútil, dando as grazas por facer caso ao Tribunal de Contas cando non é mais ca un trámite administrativo, e que na historia de Ames sempre se cumpriu con estes trámites burocráticos. Cando falaron de que non se lles facilitou información esta se facilitou na medida do posible, e foi certo que houbo un problema co servidor da Deputación, se consultou aos empregados e lles deron os datos verbalmente, polo que non poden dicir que se lles ocultou información, Que o convenio de persoal laboral está en vixencia aínda que vencido, que entenderon mal o que dixo do gasto urbanístico, o que quixo dicir foi que a previsión era reduci-lo pola crise e que tampouco había tantos proxectos de estudos e proxectos de urbanización. Non sabe de onde sacou o PP que dixo que non había saneamento no 2003, había saneamento en Bertamiráns e no Milladoiro, pero que miren a rede extendida dende entón ata o 2010, en ningún momento a previsión do goberno é de aumentar as taxas. Deben aclararse no tema do endebedamento, se o hai ou non. Di tamén que as súas afirmacións non se basean só en titulares de prensa senón en datos do ministerio, e a débeda viva de Ames por habitante no ano 2009 é de 115'48 euros, intervindo o señor **Amor** para dicirlle que eses son datos do ano 2007, preguntándolle a concelleira se entón está de acordo no nivel de endebedamento, ao cal o señor **Amor** responde que non. Continúa a concelleira dicindo que por último quere facer referencia ás diferencias de puntos de vista en torno ao gasto corrente, que non vai explicar agora como se xestionaban as garderías municipais no 2003 e como se xestionan agora. Tamén propoñían reducir indemnizacións aos concelleiros, soldos, salarios, era unha proposta verbal e non estaba membretada nin selada. Neste momento o señor **alcalde** intervén para chamar á orde ao señor **Amor** e dicirlle que non está no uso da palabra. A señora concelleira remata a súa intervención dicindo que están satisfeitos deste orzamento coas propostas engadidas polo grupo municipal do BNG e agradece á área de servizos económicos o traballo realizado.

Rematadas as intervencións o pleno da corporación por maioría simple, cos votos a favor dos 9 membros do grupo municipal socialista, os votos en contra dos 7 membros do grupo municipal popular e a abstención dos 5 membros do grupo municipal do BNG, acorda adoptar os seguintes acordos:

PRIMEIRO.- Aprobar inicialmente o Orzamento Xeral, para o exercicio 2010 por importe de 28.732.035,02 € no Estado de Ingresos e no Estado de gastos, segundo o seguinte detalle:

GASTOS	EXERCICIO	INGRESOS	EXERCICIO
DENOMINACIÓN	2010	DENOMINACIÓN	2010
CAPÍTULO 1	7.660.807,99 €	CAPÍTULO 1	6.850.000,00 €
CAPÍTULO 2	10.648.019,04 €	CAPÍTULO 2	2.400.000,00 €
CAPÍTULO 3	265.250,35 €	CAPÍTULO 3	6.419.561,89 €
CAPÍTULO 4	1.510.480,24 €	CAPÍTULO 4	6.631.322,22 €
		CAPÍTULO 5	7.815,00 €
GASTOS CORRENTES	20.084.557,62 €	INGRESOS CORRENTES	22.308.699,11 €
CAPÍTULO 6	8.096.752,26 €	CAPÍTULO 6	818.147,19 €
CAPÍTULO 7	166.250,00 €	CAPÍTULO 7	1.193.616,09 €
CAPÍTULO 8	3.000,00 €	CAPÍTULO 8	- €
CAPÍTULO 9	381.475,14 €	CAPÍTULO 9	4.411.572,63 €
GASTOS CAPITAL	8.647.477,40 €	INGRESOS DE CAPITAL	6.423.335,91 €
TOTAL ORZAMENTO	28.732.035,02 €	TOTAL ORZAMENTO	28.732.035,02 €

SEGUNDO.- Anular as modificacións que se encontran incluídas nos créditos iniciais do orzamento, con excepción de aquelas cuíos créditos estean financiados con préstamo, en cuílo caso quedarán anuladas no momento en que asine o contrato de préstamo correspondente.

TERCEIRO.- Dispoñe-la súa exposición ó público polo prazo de quince días hábiles, mediante a inserción do oportuno anuncio no Boletín Oficial da Provincia a efectos de reclamacións, conforme ó disposto no art. 169 do RD Legislativo 2/2004, de 5 de marzo, polo que se aproba o texto refundido da Lei Reguladora das Facendas Locais e art. 20.1 do R.D. 500/90 de 20 de abril. Se ó término do período de exposición, non se presentaran reclamacións, considerarase definitivamente aprobado, inseríndose, resumido por Capítulos no Boletín Oficial da Provincia, según establece o art. 169.3 do citado Texto Refundido (RDL 2/2004), en consonancia co art. 20.3 do R.D. 500/90 de 20 de abril.

Punto Sétimo.- Aprobación crédito extraordinario 1/2010.

O señor alcalde don **Carlos Antonio Fernández Castro** outorga a palabra para presentar este asunto á concelleira de Economía e Facenda dona **Patricia Conde Lois**, a cal di que se somete a aprobación plenaria esta modificación de crédito consistente nun crédito extraordinario. Di que o expediente extraxudicial é unha das vías de aprobación, pero supón a merma do orzamento vixente do ano, polo que se analizaron

outras vías que permitisen evitar esta situación, por iso o expediente que se trae a aprobación. As facturas que supoñen este expediente ascenden a 957.000 euros e se corresponden a gastos realizados no 2009 e urxe o seu pagamento. Se trata de realizar unha modificación de crédito consistente nun crédito extraordinario que financiara ese gasto corrente, posibilidade prevista no artigo 177 do Texto refundido da Lei de facendas locais. Existe informe de intervención que fala dos requisitos, os cales pasa a detallar, dicindo que se cumpren todos, e que tan pronto se aprobe procede remitilo ao órgano da Xunta de Galicia competente na materia e realizar un plan económico financeiro. Para garantir a cancelación desa operación dentro do ano próximo existe un informe de tesouraría que fala da carga financeira, do préstamo presupostado e da previsión de amortización das cuotas correspondentes tanto no 2010 como no 2011.

Intervén o voceiro do grupo municipal do BNG don **Xosé Manuel Fernández López** para dicir que o asunto de recoñecemento extraxudicial non é novidoso, o que si é novo é que se vaia a financiar con crédito extraordinario. Ao longo de toda a lexislatura se tramitaron varios expedientes de recoñecemento extraxudicial que son un fracaso da xestión económica do goberno, acumulando retraso nos pagos e dando mala fama ao concello. A finais da lexislatura traen isto, non é a solución, trátase dunha solución in extremis, xa que o goberno colocou ao concello de Ames por intereses de partido nunha situación de inestabilidade que se arrastra ano tras ano sen darlle solución definitiva. Non é este o momento de falar dos retrasos, só dicir que existe o compromiso por parte do grupo de goberno asinado co BNG de marcar como obxectivo regularizar os pagos nun máximo de 90 días, aínda que ao BNG lle gustaría que o prazo fora mais curto, pero dende o departamento de intervención se transmite que non é posible acurtalo. Insiste que se a finais de ano o prazo é de 90 días será un avance, un paso de xigante que favorecería a moitas pequenas empresas e o concello recuperaría o crédito en parte perdido. Ao BNG non lle gusta esta operación, pero entende que é un instrumento necesario para cumprir o obxectivo que comparten, así que vai facilitar que o goberno municipal poda aprobar este asunto.

Intervén o concelleiro do grupo municipal popular don **Ramón García Argibay** para dicir que tras escoitar a dona Patricia no asunto do orzamento e despois traer este punto se explican moitas cousas. Estes son gastos que se traen a pleno porque se fixeron sen crédito orzamentario. É unha técnica que prevé a lei para convalidar actos irregulares, entre comillas, que non se ofenda ninguén, e o pleno unha vez mais está socorrendo actos irregulares do goberno. O BNG vaino facilitar de novo, está no seu dereito. Hai que ler os informes de intervención que falan de desequilibrio interno en capacidade de financiación, dando lectura a continuación a certos apartados do informe aludido, para concluír que é certo que non se supera o 5% pero só por 231 euros, e que o goberno non pide mais porque non pode.

Di que outra cuestión que chama a atención é que se di nos informes que as cuotas trimestrais a amortizar teñen carácter prevalente, en boa lóxica o aboamento do préstamo conlevará retrasos no pagamento das facturas. A continuación fai as seguintes preguntas ao señor alcalde ¿vostede é coñecedor das responsabilidades que está adquirindo por actuar dun xeito irregular e que ao final trae este recoñecemento como única solución para facer fronte aos pagos? ¿queda con esta actuación solucionado o problema do gasto? ¿as facturas que son obxecto deste expediente están todas pendentes de pago? ¿estes gastos que se pretenden aboar teñen o visto e prace dos servizos xurídicos? ¿van ser estas as derradeiras facturas materia doutro recoñecemento extraxudicial? ¿se saíra aprobado este expediente que

sucedería se ningunha entidade concedera o préstamo?. Hai uns meses vostede solicitou ofertas para préstamo e só se presentou unha entidade e que se saiba aínda non está concedido. En definitiva o que está facendo o señor alcalde é buscar financiación para outro recoñecemento extraxudicial de crédito, procedemento que debería ser extraordinario e que está facendo ordinario.

Intervén a concelleira de Economía e Facenda dona **Patricia Conde Lois**, a cal expón a diferenza entre recoñecemento extraxudicial de crédito e crédito extraordinario, e di que hai dúas opcións, aprobar este crédito extraordinario e obter 957.000 euros e pagar aos provedores, e poder pagar aos do 2010. No momento que se pague aos provedores se farían as amortizacións oportunas á entidade bancaria que quedarían liquidadas como moito dentro dun ano, o que é unha vantaxe política para o goberno da seguinte corporación porque non vai ter ningunha obriga financeira. A opción B é non aprobar esta modificación de crédito e ter que asumilo contra este orzamento, porque é un gasto que xa está efectuado. Cremos que a mellor opción é a A. Efectivamente, os pagos teñen carácter preferente, o di a lexislación. O expediente conta co beneplácito da técnico, evidentemente, se non non estaría someténdose a este pleno. É certo que se arrastra de varios anos e non houbo o momento oportuno para solucionalo, pero agora se trae esta solución co obxectivo de axilizar os pagamentos.

Intervén o voceiro do grupo municipal do BNG do **Xosé Manuel Fernández López** que di que só quere comentar que este non é un crédito a longo prazo, que hai que devolve-lo no mesmo ano, é o goberno municipal actual quen o asume, o que dalgún xeito xustifica o apoio do seu grupo.

Intervén o concelleiro do grupo municipal popular don **Ramón García Argibay** para dicir que non se lle deu resposta a ningunha das preguntas que fixo, e as reitera.

Remata a concelleira de Economía e Facenda dona **Patricia Conde Lois** para dicir que se ningunha entidade concerta a operación traerían a pleno a fórmula que traen todos os anos, computar o recoñecemento a este orzamento. Respecto de se son as últimas facturas materia de recoñecemento di que é imposible sabelo porque pode producirse que ao longo do ano se produza un gasto extraordinario, de todas formas se vai tentar conter o gasto corrente. Respecto da pregunta de se vai haber mais facturas di que hai unha serie de facturas que son do exercicio pasado que se contemplan no capítulo 6 de inversión que tamén se someterán a aprobación, e é certo que existen no capítulo 4 unha serie de facturas que probablemente teñan que vir a recoñecemento extraxudicial afectando a este orzamento pero de contía insignificante. Con isto entende que se soluciona o problema, tal e como se lle preguntou.

Toma a palabra o señor alcalde don **Carlos Antonio Fernández Castro**, que di que rematado este paquete de alto contido económico quere estender a súa felicitación e o maior agradecemento tanto a quen preparou a documentación que hoxe se someteu a aprobación como a todo o equipo técnico profesional do concello dende a intervención e a tesouraría ate a secretaría xeral, quede constancia do seu mais profundo agradecemento polo traballo que veñen facendo, e sen menospreciar o traballo da secretaría, debe referirse ao traballo do novo equipo económico do concello, da señora interventora e do señor tesoureiro, que informan o que teñen que informar, din o que teñen que dicir, ninguén lles vai coartar esa liberdade que por outra parte é básica e elemental na súa función, e que informan e propoñen cousas. Toman medidas, en primeiro lugar segundo, fan propostas, terceiro buscan solucións, cuarto traballan e o

fan con moita insistencia, quinto a señora interventora fai a contabilidade e fai uns orzamentos e o señor tesoureiro regulariza as convocatorias de concursos e de licitacións a un nivel descoñecido neste concello. Por tanto non vai ser el quen mencione lapidacións ou cousas parecidas do anterior interventor, foron vostedes, e que quede clara a constancia de que foron vostedes, pero o tempo pon a cada un no seu sitio, e o novo equipo en menos dun ano foi quen de darlle unha volta grandísima á situación económica do concello e da contratación. O seu agradecemento tamén para quenes negociaron o conxunto das medidas que hoxe se aprobaron aquí, en particular o orzamento, con especial mención a tres membros do grupo socialista, o voceiro Francisco Villaverde, a concelleira de Economía e Facenda dona Patricia Conde e o concelleiro de Obras don Gustavo Nieto, que son, llo anticipo, a comisión de seguimento do grupo socialista para cando o grupo do BNG a desexe montar. O agradecemento ao grupo do BNG, que con este acordo que cuantitativa e cualitativamente é fundamental para a vida deste concello o fixeron posible. Finalmente di, non sei se seremos quen de facer cumprir este acordo, pero quede constancia de que como máximo responsable do equipo de goberno manifesto expresamente a miña mais firme vontade de cumprilo, ogallá sexamos capaces de cumprilo porque tamén será un exemplo para a cidadanía.

Rematadas as intervencións o pleno da corporación por maioría absoluta, cos votos a favor dos 9 membros do grupo municipal socialista e dos 5 membros do grupo municipal do BNG a abstención dos 7 membros do grupo municipal popular, adopta os seguintes acordos:

Primeiro.- Prestar aprobación inicial ao crédito extraordinario 1/2010 por importe de 957.875,48 euros.

Segundo.- Someter o expediente de crédito extraordinario 1/2010 a exposición pública por prazo de 15 días hábiles a efectos de exame e reclamacións mediante anuncio no B.O.P. Para o suposto de non presentarse reclamacións, a aprobación inicial quedaría elevada a definitiva de xeito automático.

Punto Oitavo.- Solicitud de comparecencia do Concelleiro Delegado de Sanidade, Reforma Administrativa e Calidade na Administración, don José Manuel Miñones Conde, solicitada polo grupo municipal popular con data 19 de abril de 2010 (nº rexistro de entrada 8537).

Intervén o concelleiro de Sanidade, Reforma administrativa e Calidade na administración don **José Manuel Miñones Conde** para dicir que non ten inconveniente ningún en comparecer e dar as explicacións oportunas, intervindo o señor **alcalde** a continuación dicindo que queda perfectamente entendida a vontade de comparecer do concelleiro. Que por lei hai que proceder á votación, e que dende este momento queda fixado por parte da Alcaldía un punto na orde do día do seguinte pleno para esta comparecencia.

Rematadas as intervencións a solicitud de comparecencia do Concelleiro Delegado de Sanidade, Reforma Administrativa e Calidade na Administración, don José Manuel Miñones Conde, solicitada polo grupo municipal popular con data 19 de abril de 2010 (nº rexistro de entrada 8537) é aprobada por unanimidade da corporación municipal.

C) PARA CONTROL DO GOBERNO:

Punto Noveno.- Mocións.

a) Moción do grupo municipal popular para que non se efectúe a segregación da USC e non se imparta a docencia clínica da titulación de medicina nas universidades da Coruña e Vigo.

Intervén o concelleiro do grupo municipal popular don **Alfonso Rey López** para dicir:

O PP de Ames faise eco do sentir maioritario dos estamentos da Facultade de Medicina de Santiago de Compostela, Decanato e Departamentos, que estiveron en contra de que o reitor firmase o convenio da docencia clínica cos outros reitores das universidades galegas e coa Xunta, e pide con eles e os candidatos a reitor da USC que non se segreguen os estudos de Medicina, pois consideran que danaría a organización dos mesmos e que se daría un paso cara a súa duplicación, e mesmo triplicación na Coruña e en Vigo, como parece deducirse das declaracións dalgún dos reitores. O decanato e os directores de departamento ven no acordo unha porta aberta a creación de novas facultades en Vigo e, sobre todo, na Coruña.

Na facultade estase a favor da descentralización de parte da docencia clínica para os tres últimos cursos (4º, 5º e 6º) que son os de maior carga práctica, xa que o CHUS non se pode facer cargo de todo o alumnado que chegou a unha cota de 350 en 1º. Pero esta estratexia deféndese sempre baixo a tutela da USC a todos os niveis, como foi ata o de agora, porque, aínda que este curso a descentralización no CHUAC e o CHUVI aumentou (suman 250 estudantes), non é un sistema novo.

Pero non só lles ofrece dúbidas a figura do “colaborador docente”, tamén pensan que isto puidera traer como consecuencia a descentralización da docencia teórica. Segundo XXXXX, esta podería ser atendida, ademais de por docentes da USC, por outros da UDC e da Uvigo a través de convenios específicos coa USC.

Pero hai máis. Unha das claves do rexeitamento ao pacto é que a USC cederá a vinculación administrativa dos médicos docentes á Universidade máis próxima aos respectivos hospitais. Así, aínda que só a USC ten a carreira de Medicina en Galicia, os médicos do CHUAC que asuman a docencia clínica de parte dos seus alumnos estarán vinculados a ese nivel á Universidade da Coruña, e os do complexo vigués, á de Vigo.

A USC só manterá a vinculación académica con estes docentes, nunha especie de figura híbrida pendente aínda de desenvolver, pero á que xa se lle deu o nome de “profesor colaborador docente”. Medicina considera que será “inaplicable”, xa que situaría a profesores e alumnos nunha situación de inseguridade administrativa, académica e inclusive xurídica.

Todos teñen, e temos, o sentimento de que o pacto obedece a intereses localistas, especialmente da Coruña que, desde fai tempo, reclama o segundo ciclo de Medicina.

Se hai intereses localistas, está claro que a Santiago non lle interesa que ese pacto vaia adiante e, se a Santiago non interesa, a Ames, na área de influencia de Santiago, tampouco, por iso traemos a Pleno esta Moción que está na liña da declaración institucional na que PSdeG, BNG e PP de Santiago se opoñen a “calquera iniciativa orientada á división ou segregación da titulación de Medicina no ámbito da Universidade de Santiago”, pois a descentralización sería unha “ruptura” dos principios do mapa de titulacións aceptados no momento histórico da creación das Universidades da Coruña e Vigo.

Intervén a concelleira do grupo municipal do BNG dona **Mercedes Vidal Baamonde** para dicir: Resulta complicado argumentar arredor desta moción sen caer en tópicos ou localismos. Se leva discutindo dende hai bastantes meses nos ámbitos universitarios e a través dos medios de información sobre o mellor xeito de formar e

aunar esforzos para mellorar a formación dos futuros médicos, e non se chegou a un acordo por intereses claramente localistas. O 26 de febreiro se asinou un acordo entre os reitores das tres universidades galegas, o conselleiro de educación e a conselleira de sanidade, acordo que non satisfai as necesidades de formación e non remata coa batalla dos intereses localistas. Agora se nos pide que apoiemos incondicionalmente á USC cando o reitor é asinante do acordo. Hai que dicir, como xa dixo o compañeiro Alfonso Rey que a Xunta, a Facultade de Medicina e a de Odontoloxía fixeron público un acordo dirixido á poboación en xeral onde claramente din que non se resolven as necesidades de docencia que teñen os alumnos de medicina deste novo sistema e advirte que se pode colocar nunha inseguridade administrativa, académica e mesmo xurídica, tanto aos alumnos coma aos profesores, pero tamén está constatado que o CHUS é insuficiente para dar formación, non só aos alumnos de Medicina, senón aos de Enfermería e aos Erasmus.

Nós entendemos que a saída ten que pasar por un consenso, unha negociación entre as Universidades e a Xunta de Galicia considerando o que é mellor para o país e nunca por iniciativas electoralistas. Entendemos que se deben de poñer a disposición da formación sanitaria os centros públicos da rede sanitaria pública galega que sexan precisos, co gallo de garantir un acceso rápido e de calidade á formación especializada.

Intervén o concelleiro delegado de Sanidade, Reforma administrativa e Calidade na administración don **José Manuel Miñones Conde** para dicir: Lévese moitos anos falando do mesmo. Ante esta moción, que é unha transcripción case literal da declaración institucional que se fixo no concello de Santiago e como xa adiantamos na comisión informativa de educación, no fondo da cuestión estamos de acordo en apoiar as accións da Universidade, opoñernos á división da titulación de Medicina e apoiar o campus da saúde, pero hai que comentar cal é o fondo e cal é o problema, os estudantes. En principio pensei que se estaba a falar de 300 estudantes, dos cales Santiago pode acoller 200, pero estamos a falar de 900 estudantes dos últimos tres anos, quedando 700 sen poder facer as prácticas tuteladas se non se chega a un acordo. Do acordo asinado o 26 de febreiro polos tres reitores e a Xunta de Galicia a min me gustaría sinalar o que di textualmente o reitor da Universidade de Santiago nunha entrevista que se fixo pública dúas ou tres semanas despois: *Volvo dicir que este acordo foi pola necesidade dun recurso que xestiona Sanidade, non as Universidades de Vigo e da Coruña. Sempre dixeran que os hospitais non son das Universidades, entendo os concertos cos hospitais como un convenio de uso, e ata podo entender que de uso preferente, pero non exclusivo. Daquela, evidentemente este acordo débese a que quen ten a responsabilidade da xestión en exclusiva dos hospitais e recursos ambulatorios é quen nos obriga a ter que chegar a el. "Obriga", iso di un dos asinantes do acordo.*

Se o problema se traslada ao que pasa en Farmacia é exactamente o mesmo, nas prácticas de farmacia hospitalaria, que están tuteladas por médicos, o que se asina coa Consellería de Sanidade é un convenio para uso do hospital ¿por que en Farmacia se chegou a acordo e en Medicina non? Esa é a dúbida. Si que hai localismos, pero tamén hai que dicir que en repetidas ocasións os reitores dixeran que a filosofía de USC era o pacto para a titularidade única de Medicina, entón como ben se di na exposición de motivos da moción, estamos a falar de división hipotética, porque a día de hoxe non se pode afirmar que este acordo leve a unha división. Para gustos cores, sae o reitor da Universidade da Coruña dicindo que este é o primeiro paso para a

Facultade de Medicina, pero a realidade non é esa. O que se ten que buscar é o consenso das tres Universidades e da Xunta e asinar os convenios para que a tutela das prácticas deses alumnos estea a cargo de profesionais médicos, pero tal e como se recolle no acordo é para persoal que vai depender do Sergas, e a coordinación docente dependerá da USC, do que non se pode extraer que haxa unha división, a coordinación administrativa dependerá do Sergas. Nós, no fondo da moción, que é chegar ao acordo de opoñernos á división imos apoiar, porque non podemos permitir como área metropolitana de Santiago de Compostela, esa hipótese da división, pero queremos deixar sobre a mesa e que a xente saiba que o problema son os alumnos que non teñen onde facer as súas prácticas.

Intervén a concelleira do grupo municipal do BNG dona **Mercedes Vidal Baamonde** para dicir: Penso que este non é o foro adecuado para discutir os problemas que teñen as universidades. É verdade que ese documento de Bases para a cooperación universitaria na docencia do grao en medicina non especifica para nada que se vaian crear dúas ou tres facultades, o cal eu entendería coma un despropósito soberano, xa que temos dificultades para manter unha soa a un nivel que nos poda dar acceso a participar en proxectos de investigación ou acceder a determinados niveles de cualificación científica. O documento, a solución que atoparon, é un mal parche para a situación da docencia de pregrao, quixeron inventar o que xa estaba inventado e resolto en Madrid e en Europa en xeral, o profesor colaborador docente, figura que pon en risco a titulación, é un despropósito.

Entendendo que non hai evidencia de que o documento de Bases signifique que se produza a partición da Universidade, que calquera variación do mapa das titulacións ten que pasar polo consenso entre as tres universidades e a Xunta de Galicia, que hai que poñer a disposición toda a rede sanitaria pública para a formación de pregrao de Medicina, porque por exemplo con este sistema Ourense, que estaba dando formación de pregrao, quedaría fóra despois de anos de impartila. Porque non está nada claro e porque non se pode xogar con intereses localistas, o BNG se vai abster.

Intervén o concelleiro do grupo municipal popular don **Alfonso Rey López** para dicir: Non observo excesivas diferenzas entre os vosos postulados, e se non é así corrixídemme. Efectivamente o dos localismos é un tópico, e no que respecta a este tema eu penso que A Coruña ven desexando dende hai tempo esta titulación e supoño que as demais universidades reaccionarán. En canto á mellor maneira de formar estou totalmente de acordo, lembro que era un dos argumentos dos mais entendidos, que están todos posicionándose en contra. Entendo que todo isto ten que pasar por un consenso. Eu penso que os alumnos teñen que facer as prácticas co profesor que os vai avaliar. Sobre a “obriga” da que fala o reitor, efectivamente parece que foi así. Que un traballador, dende unha perspectiva dependa do Sergas e dende outra da USC non é o mais correcto.

Rematadas as intervencións a moción do grupo municipal popular é aprobada por maioría absoluta cos votos a favor dos 9 membros do grupo municipal socialista e dos 7 membros do grupo municipal popular e a abstención dos 5 membros do grupo municipal do BNG. O texto da moción aprobada é do teor literal seguinte:

Moción do grupo municipal popular para que non se efectúe a segregación da USC e non se imparta a docencia clínica da titulación de medicina nas Universidades da coruña e vigo.

Exposición de motivos

Nos últimos tempos, estase a falar de posibilidade de que se imparta a docencia clínica da titulación de medicina nos hospitais universitarios de Santiago de Compostela, A Coruña e Vigo.

Diante das dúbidas e interpretacións xurdidas polo acordo asinado o pasado 26 de febreiro entre os Reitores, en representación das tres universidades galegas e a Xunta de Galicia debido a esta posibilidade, e:

1. Considerando que a división ou a segregación do ámbito da Universidade de Santiago de Compostela suporía unha ruptura dos principios do mapa de titulacións aceptados no momento histórico da segregación dos Colexios Universitarios para a creación das novas universidades de A Coruña e Vigo, cando a USC renunciou a outras titulacións para poder manter en exclusiva a docencia de medicina.

2. Considerando que ao plantexar unha división do ensino da medicina en momentos de grave crise económica, só contribuíría a empobrecer un sistema que ven demostrando dende fai séculos unha probada eficacia e solvencia tanto nos apartados da investigación como nos da docencia.

Considerando que un dos piares do prestixio universal da USC é o ensino da medicina, e que con unha hipotética división ou segregación suporía unha merma e unha diminución de eficacia e calidade, e a isto habería que engadir o incremento do gasto que conlevaría implícita esta hipotética decisión.

Para evitar esta situación, consideramos que é o momento de apoiar de forma clara e contundente á USC mediante a seguinte

Proposta de acordo

1. O Pleno do Concello de Ames acorda apoiar con total claridade e de forma expresa todas as accións da USC encamiñadas á defensa da súa integridade e do servizo público que presta a Galicia.

2. Rexeitar calquera iniciativa orientada á división ou segregación da titulación de Medicina no ámbito da USC.

3. Apoiar o proxecto de Campus da Saúde da USC como un proxecto de Galicia, solicitando o compromiso de todas as administracións públicas para garantir o seu pleno desenvolvemento, que redundará en beneficio de todos os galegos no empeño de ter unha sanidade eficiente e cos mellores profesionais.

4. Dar traslado deste acordo á Universidade de Santiago de Compostela e á Xunta de Galicia.

b) Moción do grupo municipal socialista para a declaración do 17 de maio como Día Internacional contra a Homofobia, Transfobia e Bifobia.

Intervén a concelleira delegada de Benestar social e Igualdade dona **Isabel González Cancela** para dicir: Na comisión informativa correspondente aceptouse a proposta dos membros do grupo municipal popular de poñer entre paréntese os significados de homofobia, transfobia e bifobia. En canto ao voto particular que formularon na mesma comisión os membros do grupo municipal popular relativo ao cambio de data por coincidir con datas tan significadas como o Día das Letras Galegas e o Día das Telecomunicacións, non depende do grupo municipal socialista, ven dada a nivel estatal. A continuación da lectura aos catro puntos da parte dispositiva da moción.

Intervén o concelleiro do grupo municipal do BNG don **Vítor Vicente Díaz** para anunciar o voto favorable do seu grupo municipal.

Intervén o concelleiro do grupo municipal popular don **Bernardo Moar Míguez** para preguntar se o voto particular non se debe votar antes da moción, intervindo a señora secretaria dona **Rosa Ana Prada Queipo** para dicir que efectivamente na comisión informativa o grupo municipal popular formulou un voto particular por non estar de acordo coa data proposta, propoñendo o cambio para outro día. O señor **Moar Míguez** procede a repartir unha folla coa súa proposta de voto particular. Tras dar lectura a esta proposta, a señora **secretaria** intervén para dicir que o voto particular proposto na comisión informativa se refería só ao cambio de data, permanecendo o resto do texto da moción inalterable, e que nesta proposta hai cambios, e que o que procede é que o texto permaneza idéntico salvo a data. Di o señor **Moar** que propoñen cambiar a data do 17 de maio para o 16 ou o 18 de maio, un día antes ou despois, tendo ademais presente ao presidente da Fegamp.

Toma a palabra o señor alcalde don **Carlos Antonio Fernández Castro** para dicir que hai que ter en conta que se trata da proposta dun Día Internacional, non obstante, non hai inconveniente en proceder á votación do voto particular formulado polo grupo municipal popular.

Intervén a señora **secretaria** para dicir que de aprobarse o voto particular ten que quedar ben claro que quedaría automaticamente modificada a moción no que respecta á data.

Realizada a votación, **o voto particular do grupo municipal popular** relativo a cambiar a data do 17 de maio na moción do grupo municipal socialista para a declaración do 17 de maio como Día Internacional contra a Homofobia, Transfobia e Bifobia, polo día 16 ou 18 de maio, é rexeitado cos votos a favor dos 7 membros do grupo municipal popular, os 9 votos en contra dos membros do grupo municipal socialista e as 5 abstencións dos membros do grupo municipal do BNG.

Rematadas as intervencións, a moción do grupo municipal socialista é aprobada por maioría absoluta cos votos a favor dos 9 membros do grupo municipal socialista e dos 5 dos membros do grupo municipal do BNG e a abstención dos 7 membros do grupo municipal popular. O texto da moción aprobada é do teor literal seguinte:

Moción do grupo municipal socialista para a declaración do 17 de maio como día internacional contra a homofobia (fobia aos homosexuais), transfobia (fobia aos transexuais) e bifobia (fobia aos bisexuais).

Exposición de motivos

Cando se cumpren 20 anos dende que a Asemblea Xeral da Organización Mundial da Saúde suprimira a homosexualidade da súa lista de enfermidades mentais, é necesario mostrar a nosa solidariedade para con millóns de persoas en todo o mundo, que seguen a sufrir graves discriminacións por razón da súa orientación sexual ou identidade de xénero, e de recurso ás institucións públicas para erradicar a homofobia e a transfobia.

É sabido que o noso país está na vangarda da defensa dos dereitos dos homosexuais, transexuais e bisexuais, pero a discriminación por orientación sexual, afectiva, está enraizada na nosa sociedade. Por iso é unha labor das institucións traballar na loita contra estas discriminacións, axudando a facer visible e normalizar o feito lésbico, gay, transexual e bisexual.

Tanto os poderes públicos como os cidadáns temos a obriga de axudar a sensibilizar e traballar en prol da igualdade real das persoas.

A información e a educación son os camiños para acadar unha sociedade máis xusta, onde as persoas podan vivir en harmonía coa súa orientación sexual en todas as nosas vilas e cidades. O contexto actual esixe unha visibilidade máis cotiá que ofrezca a realidade do colectivo homosexual e transexual en toda a súa diversidade dunha maneira positiva.

Os poderes públicos tamén deben loitar contra a transfobia e homofobia en todos os ámbitos da sociedade, especialmente durante a adolescencia, cando se está formando a personalidade e son máis vulnerables, facendo plans especiais anti-bullying.

É importante lembrar que, a nivel internacional, a homofobia, a transfobia e a bifobia, poden ter forma da lei que condena as relacións sexuais entre persoas do mesmo sexo, como acontece en oitenta países, ou incluso pena de morte, como acontece en oito nacións.

Debemos traballar porque a discriminación por motivos de orientación ou identidade sexual, ou de xénero, sexa erradicada e traballaremos para que o 17 de maio sexa ao fin considerado día internacional contra a homofobia, transfobia e bifobia, e que a ONU urxa aos estados a tomar todas as medidas necesarias, lexislativas ou administrativas para asegurar que a orientación sexual ou identidade de xénero non poida servir de base para a acción penal.

Por estas razóns, o Concello de Ames:

1º. Apoia a declaración de 17 de maio como Día Internacional Contra a Homofobia, e insta ao Goberno de España para pedir diante da declaración da Organización das Nacións Unidas o 17 de maio como o Día Internacional Contra a Homofobia, a Transfobia e a Bifobia, en defensa dun dos principios básicos da Carta Internacional de Dereitos Fundamentais, como é a non discriminación.

2º. Insta ao Goberno de España para defender en fronte da Organización Mundial da Saúde (OMS) para que deixe de considerarse a transsexualidade como unha desorde mental e promova o acceso á atención sanitaria e o apoio psicolóxico que estas persoas precisan, incluíndo a reasíñación de xénero, se fora desexada, que lles permitan adaptar o estatus civil ao seu xénero de preferencia e vivir a vida social, familiar e profesional sen ser expostas nin expostos á transfobia, aos prexuízos e aos crimes de odio, sendo protexidos e protexidas pola policía e os sistemas xudiciais fronte a todo tipo de violencia física ou non.

3. Insta ao Goberno de España a que promova que os organismos de Dereitos Humanos de Nacións Unidas examinen as violacións dos dereitos humanos que afrontan os homosexuais, bisexuais e transexuais en todo o mundo e para tomar medidas concretas para combatelos; instando aos países do mundo a erradicar a discriminación por orientación sexual ou identidade de xénero.

4. Comprométese a traballar activamente contra a homofobia, a transfobia e a bifobia e a respectar a igualdade de trato da comunidade europea, de España e de Galicia.

Punto Décimo.- Rogos e preguntas.

Rogos.

Intervén o voceiro do grupo municipal do BNG don **Xosé Manuel Fernández López** para formular o seguinte rogo:

Primeiro rogo.- En relación cos contedores soterrados do Milladoiro, en concreto na rúa do Seixo e na rúa das Camelias, hai protestas dos veciños e eu teño comprobado *in situ* que os de vidro e os dos envases teñen as bocas moi reducidas e teñen unha especie de prancha circular que provoca que non collan ben os envases e cando os veciños tentan metelos en mais dunha ocasión se cortaron nas mans. Non sei se hai algún motivo especial para que teñan esas planchas, en todo caso rogo que se revisen.

Intervén o concelleiro do grupo municipal popular don **Alfonso Rey López** para formular o seguinte rogo:

Segundo rogo.- Alguén dixo que o home era un animal político e eu quero converter neste momento ao home nun ser humano. Felicito a XXXXX, que está afañándose en cumprir cos tres obxectivos básicos de toda persoa, supoño que algunha árbore terá plantado, supoño tamén que escribiu ou escribirá algún libro, e agora felicidades polo fillo. Como eu sei que sabes tocar música, quixera cumprir, como adoito facer eu nestes casos, co compromiso de pedirche que lle cantes esta nana a XXXXX.

CANTIGAS DE BERGE

Para XXXXX

*Eu quero arrolar
meu fillo pequeno,
que o quero durmir,
que o quero, que o quero.*

Amigos que vides
a ver o meu neno,
pisade con tino,
entrade en silencio,
*que quero durmir
meu fillo pequeno,
que o quero durmir,
que o quero, que o quero.*

Amigos que vides
a ver o cativo,
entrade en silencio,
pisade con tino,
que quero durmir ...

Meu fillo xa dorme,
ceade para atrás,
volve de despois,
volve de mañá,
que quero durmir ...

Volve de mañá,
volve de despois,
que dorme o meniño,
que descansa Antón.

*Eu quero que durma
meu fillo pequeno,
eu quero que durma,
que o quero, que o quero.*

Este meu rapaz
non quere durmir,

non gusta do canto
que estou a dicir.
*Xa dorme, xa dorme,
xa quedou durmido,
gustou do cantar
que sempre lle digo.*
Este meu rapaz non
quer descansar,
non gusta do canto
que estou a cantar.
*Xa dorme, xa dorme
no berce dourado,
gustou da cantiga
que sempre lle canto.*

25-IV-2010.

Intervén o concelleiro do grupo municipal popular don **Ramón García Argibay** para formular o seguinte rogo:

Terceiro rogo.- Segundo me manifestaron veciños do lugar de Barreiros en Bugallido, teñen presentado varios escritos no rexistro de entrada con firmas solicitando a recuperación dun camiño que parece ser que nalgún momento foi de dominio público, adxuntando planos onde se aprecia dito camiño. Parece ser que este problema xa ven do ano 2003, polo que eu rogo que se poñan en contacto con eses veciños ou cos seus representantes e, se teñen os datos suficientes, llos aporten, para rematar dunha vez con este tema.

Toma a palabra o señor alcalde don **Carlos Antonio Fernández Castro** para dicir: Voulle dar unha resposta de memoria, co risco que iso supón de cometer algún erro, pero estou case seguro de que lle vou dar unha información correcta e mañá ou o luns ceciorareime. Ese asunto foi resolto xa no seu día, houbo unha resolución municipal, se escribiu unha carta a cada un dos veciños asinantes da petición, e polo que nos contestaron a continuación mesmo algún deles non sabía ben o que asinara. Ten que existir un pequeno expediente no departamento de urbanismo con resolución firme, porque coñezo perfectamente o caso, o camiño tiña un antigo somier a título de cancela que non impedía o paso, só había que apartalo, é un tema que ven de moi vello pero que ten resolución municipal. Eu pedirei que se recupere ese expediente e facilitarreillo. Se non lembro mal, moitos veciños nos manifestaran que a súa sinatura estaba alí pero que non compartían o fondo da cuestión, e mesmo creo que pasara moito tempo dende que asinaran ate que se presentaron os escritos no rexistro. Tómenme isto coas debidas cautelas, pero saiban que coñezo perfectamente o asunto aínda que nono lembre en todos os extremos, en calquera caso teñen acceso ao expediente para que o poidan verificar.

Preguntas.

Intervén o voceiro do grupo municipal popular don **Santiago Amor Barreiro** para formular a seguinte pregunta:

Primeira pregunta.- Se trata dunha pregunta relativa a un proxecto que lle presentou o cardiólogo XXXXX para que se habilite unha parte do paseo como zona cardiosaludable, con recursos cardiovasculares, e vostede trasladou á prensa dicindo que estaba pendente dos informes técnicos. Eu lle fixen unha solicitude con data 22 de

decembro de 2009 pedindo acceso ao proxecto e aos informes. A pregunta é se o proxecto ten visos de levarse a cabo ou está zanzada a proposta.

Toma a palabra o señor alcalde don **Carlos Antonio Fernández Castro** para dicir: Vou falar agora tamén de memoria, co risco de equivocarme pero co compromiso de verificalo con exactitude. Polo que eu lembro, o cardiólogo XXXXX, compañeiro do partido socialista, mantivo comigo unha concienzuda conversa nunha cafetería de Bertamiráns na que me dixo que tiña unha idea que consistía en que íamos ser o primeiro sitio do mundo en ter unha área de saúde para persoas con afeccións cardíacas. Non lembro se recibín unha ou dúas follas de papel, como moito é o que puiden ter recibido, mañá miraremos se apareceu algo presentado vía rexistro de entrada, penso que non, estou case seguro de que non. Cando me plantexou esta idea, tal e como lles comentei outra vez con motivo da Casa Verde e doutros moitos proxectos que nos fan todos os días, eu lle dixen que se isto recollía unha serie de puntos con pulsador coma os que hai nas autoestradas e aotovías por se a alguén lle daba algún problema cardíaco, se tiña que haber desfibriladores ao alcance de calquera no paseo fluvial, etc., me metía bastante medo, tendo en conta ademais que nun sitio coma o paseo fluvial é frecuente que haxa algunha actuación de vandalismo, como tamén hai nas marquesiñas de autobuses. Hai persoas que fixan a súa idea nunha cousa que lles parece o mais importante do mundo, eu tiven conversas sobre isto no propio concello e todo o mundo que tiña arredor me dixo que con iso había que ter moito coidado, que había que miralo moito e que tiña que ser un proxecto moi firme, a ver como se custodia, a ver quen o tutela, quen o vixía, e así llo transmitín ao señor XXXXX. Hai un mes aproximadamente, no programa de radio que teño os xoves, interveu unha señora dicindo que era a muller dun afectado de enfermidade cardíaca, que por qué non facíamos iso, e eu lle din unha explicación neste mesmo tono. Creo que a calquera dos vinte e un concelleiros da corporación lles gustaría que Ames fora o primeiro concello do mundo en algo, pero cando se trata dunha cousa tan delicada e seria non podemos precipitarnos. Así llo manifestei a esta señora, quen de repente cortou a comunicación e o que saíu a continuación foi o propio XXXXX dicindo mira Carlos, déixate de tonterías, os políticos non sei que... Dáse a casualidade de que a idea de que unha cousa así poda funcionar no noso concello, sobre todo se somos pioneiros, me gusta coma ao que mais, e eu tiña contacto cunha fundación estatal que está avalada polo Ministerio de Sanidade que se chama Fundación Zonas Cardio, e coma presidente da Fegamp citara ao máximo dirixente da fundación na sede da Fegamp, onde o atendín, e a ese mesmo señor lle pedín que falase con XXXXX, mirase o proxecto e me dixese se o podía avalar porque eu quería ser o primeiro concello do mundo que tivese unha zona de especial atención para enfermos, neste caso cardiovasculares. Non teño ningunha referencia e polo tanto creo que é unha proposta que deberíamos estudar moi polo miúdo e non tomar unha decisión arriscada, pero non hai ningún inconveniente en analízalo.

E non habendo mais asuntos de que tratar, o señor alcalde presidente dou por rematado o acto e levantou a sesión á unha e cincuenta horas do día 30 de abril de 2010, de todo o que eu como secretaria certifico.

Vº Prace

A secretaria

O alcalde

